

PAVORO ITSIRINKAIGAKENERIRA KORINTOKUNIRIRA

Ikogakotagantaigakerira kametikyarika inaiwake

1 ¹⁻²¿Aiñogivi viroegi kametikya pinaigake? Narori aiñona aka kametikya nonake. Maika inti notentaka apigematsatene Soseneshi nontsirinkai-gakempira viroegi kematsaigiririra Tasorintsi timaigatsirira Korintoku, ikogakagakenatari Tasorintsi nompega-kempira iritigankane Jesokirishito. Ario pikañoigaka viroegi ikogakagaigakempi pinkematsaigakerira Jesokirishito kameti irishintasanoigakempira. Aikiro ikogaka-gaigakempi pampakuaiganakerora magatiro terira onkametite irorokya pimpiriniventaigake magatiro ikogageti-rira irirori pintentaigakempirira maganiro timageigatsirira parikotipageku niaigiririra Atinkami Jesokirishito ishineventaigara. Irirori inti irashiegi Itinkamiegi, aikiro inti ashiegi Atinkamiegi maganiro aroegi. ³Noniaven-taigakempi inkavintsaavageigakempira Apa Tasorintsi intiri Atinkami Jesokiri-shito intimakagaigakempira kameti ganiri tatoita povankinaventumaigaa.

Pavoro ishineventakarira Tasorintsi ineakera ikavintsajaigakerira Korintokunirira

⁴Omirinka noniirira Tasorintsi nokantakeri noshineventakari noneakera ikavintsajaigakempira viroegi pikema-

tsaigakeritari Jesokirishito. ⁵Irorotari yagaveakagantaigakempirira pinkenki-tsavageigakera, aikiro pogovageigakera. ⁶Nerotyo pogotantaigakarira arisano nokantasanotake nokamantakotakerira Kirishito nokenkitsatimoigutimpira okyara. ⁷Ikavintsaavageigakempi Tasorintsi yagaveakagantaigakempirira magatiro pogiaigavakerira Atinkami Jesokirishito impigaatera. ⁸Irirori inkantakani ishintsitagaigakempi ganiri papakuaiganai pikematsaigakera kameti ganiri otimi tatarika oita inkisaviigakem-pirira impogini impigaatera. ⁹Yogari Tasorintsi omirinka itsatagiro ikantageti-rira, irirotari kogakagaigakempi pinkematsaigakerira Atinkami Jesokiri-shito kameti pintentasanoigakempirira. Irirori inti Itomi Tasorintsi.

Ikantaigakerira inkemavakagaigakempira

¹⁰Maika, napigematsaegine, nonkantai-gakempi kañomatata irironirika kantankitsi Atinkami Jesokirishito, pagavakagaigakempira pintentavakaga-sanoigakempira gara pikisavakagaiga, onti pinkemavakagasanoigakempa. ¹¹Onti nokantaigakempi maika nokema-koigakempitari pikisavakagaigakara, ikamantaigakenatari onampiriaegi Koroe. ¹²Paniropage pikantaiganake: “Naro inti nokematsaigi Pavoro.” Pashini onti ikantaigake: “Inti nokematsaigi Aporoshi.” Pashini onti ikantaigake: “Inti

nokematsaigi Perero.” Pashinikya kantaigankitsi: “Naroegi inti nokematsaigi Kirishito.” ¹³¿Matsi ario itovaigake Kirishito nerotyo pikañoigakerora maika? ¿Matsi naro ikentakoitake nokamaventai-gakempira? ¿Matsi iroto yogiviatashiigakempi pikematsaigakenara naro? ¹⁴Matsi ariokonatyo tera tyani nogiviatumate pashini, intagani nogiviatake Kirishipo intiri Gayo. ¹⁵Nerotyo gara tyani kantatsi onti yogiviatashitunkani ikematsakenara naro. ¹⁶Aikiro nogiviatakeri Esetepa-nashi intiegiri iitaneegi magimoigiririra. Tera nosuretaemparo tyani nogiviatake pashini. ¹⁷Teranika iroto intigankavitena Kirishito nogiviantavagetakera, ontityo itigankavitakena nonkenkitsavagetakera nonkamantaigakerira maganiro tyara ikanta Tasorintsi yogavisaakotantira, kantankicha antari nokenkitsatira tera ario nonkañoigempari ikenkitsaigira govageigatsirira ikenkitsavageigira, onti nogikoneatasanotakero magatiro kameti inkemaigavakenaniri irogoigakera ikamaventaigakerira Kirishito koroshiku. Antari garira nokañotiro maika garorokari ikemaigana ario tyara inkantaigakempara irogoigakera kameti irogavisaakoigakenkanira.

**Tasorintsi pairotyo yogovageti
yavisavageigakerityo maganiro
govageigatsirira**

¹⁸Antari ikenkitsatakotaganira Kirishito ikamakera koroshiku irogavisaakoigakera yogaegiri terira irogavisaakoigenkani ineaigakero tera tatoita onkametitantumatempa tyampa inkantaigakero. Kantankicha aroegi yogavisaakoigakerira Tasorintsi agoigake irorotari yogavisaakotantaigakai. ¹⁹Ariotari okantakeri Itsirinkakagantakerira okanti:

“Impogini oneakenkani tera irogotumaige yogaegi govageigatsirira.

Ario onkañotakempa magatiro isuregeigarira govageigatsirira oneakenkani tera tatoita onkametitantumatempa.

Narotari kañotagagetakerone maika.”

²⁰¿Matsi tatoita okametitanta yogovageigirira govageigatsirira intiegiri gotagantaigatsirira intiegiri aikiro niaventaigirorira posantepage kipatsipagekutirira? Ineakagantakerotari Tasorintsi magatiropage oka tera tatoita onkametitantumatempa. ²¹Yogari Tasorintsi pairotyo yogovageti, irorotari ikantankarira: “Gara tyani gaveatsi tsikyata irogotakenara kameti nogavisaakotakeriniri.” Nerotyo intagani yogavisaakoigake kematsaigakerorira Niagantsi nokenkitsatkoigirira, ineaigavetakarotyo pashini tera tatoita onkametitantumatempa.

²²Yogari jorioegi ikogaigake ineakagaigakenkanira terira oneimagetenkani. Yogari guriegoegi onti ikogaigake irogovageigakera. ²³Kantankicha naroegi inti nokenkitsatkoigake Kirishito nokamantantaigakerora ikamaventaigakaira ikentakotunkanira koroshiku kameti irogavisaakoigakenaniri. Yogari jorioegi onti otsimajaigakenaniri. Yogari terira iriroegi jorioegi onti ineaigakero tera tatoita onkametitantumatempa. ²⁴Kantankicha maganiro jorioegi intiegiri terira iriroegi jorioegi ikogakagai-gakerira Tasorintsi inkematsaigakerira yogoi-gake onti yogavisaakovigakeri ikematsaigakerira Kirishito. Gamera inti ario tyara inkantaigakempa irogavisaakoigakempara tsikyata, igantagatari ikantakera Tasorintsi pairani onkañotakempara maika pairotari yogovageti.

²⁵Ogari irogotane Tasorintsi ineaigavetakarira matsigenkaegi tera tatoita onkametitantumatempa, pairotyo avisavagetakero irogotaneegi iriroegi. Ario okañotaka tyatirika ineaigake iriroegi tera iragavee Tasorintsi, pairotyo avisavagetakero yagaveavageigirira iriroegi.

²⁶Kañotari viroegi maika pikonogagarrantaigaka tera pogovageigavetempa, aikiro tera pagaveavageigavetempa. Ario okañotaka aikiro pikonogagarrantaigaka yonampiitakempi, kantankicha ikogakagaigakempityo Tasorintsi pinkematsaigakerira. ²⁷Ikogakagaigakeritari inkematsaigakerira terira irogoigavetempa kameti irogipashiventaigakeriniri pairorira yogovageigi. Ario ikañoigakeri aikiro ikogakagaigakerira terira iragaveaigavetempa kameti irogipashiventaigakeriniri gaveavageigatsirira. ²⁸Ikogakagaigakeritari inkematsaigakerira yonampiigunkanirira intiegiri terira irishineventaigavetenkani kameti ganigeniri yagaveavageigai ineaigavetunkanirira yagaveavageigi. ²⁹Ario ikañotagakero Tasorintsi maika ganiri tyani gaveatsi iraventakovagetakempara inkantakera: “Narori tsikyata nagaveake.” ³⁰Kantankicha viroegi yoganiaigakempi, aikiro yagaveakagaigakempi, pikematsaigakeritari Jesokirishito pitentansanoigakari. Irirotari itigankake Tasorintsi inkamaventaigakaera kameti ankematsaigakeririka agotasanoigakera. Irirori inti saankakerorira akañovageigara kameti ineaigakaeniri Tasorintsi kañomatata tenirikatyo ankañovagetumaigempa, aikiro iriro gaveakagaigakai anegintevageigakempara ampiriniventaigakerora ikogagetirira Tasorintsi, ikamaventaigakaitari yogavisaakoigakaira ganigeniri yashintaigajai kamagarini, irirokya shintaigajaene Tasorintsi. ³¹Ariotari okantakeri Itsirinkakagantakerira Tasorintsi okanti: “Garatyo tyani ventakovagetumatacha, intityo irishineventakempa Atinkami.”

**Tyara ikantaka Pavoro
ikenkitsatakotakerira Kirishito**

2 ¹Napigematsaegine, karanki noatutira nokenkitsatimovageigutimpira nokamantakotakerira Tasorintsi tyara

ikanta yogavisaakotantira tera ario nonkañoigempari ikenkitsaigira govageigatsirira ikenkitsavageigira, ²teranika nonkogumate nosuregetakempara pashini, intaganityo nosuretasavagetakata Jesokirishito ikentakotunkanira. ³Antari naratinkimoigakempira nokenkitsatimoigakempira onti notsarogavagetake noshigekavagetake, noneakatari tera tsikyata nagavee naro. ⁴Ario okañotaka aikiro noniaigakempira nokenkitsatimoigakempira tera ario nonkañoigempari govageigatsirira ikenkitsavageigira kameti ganiri iroro nokematsatagantaigimpi nashi noniane, tsikyatatyo inkematsagaigakempi Isure Tasorintsi, pineaigaketari iriro gaveakagakena Tasorintsi. ⁵Onti nokañotakero maika kameti ganiri iroro pikematsaviigana nogovagetakera, onti pinkematsaigakena pineaigakera inti gaveakagakena Tasorintsi.

**Isure Tasorintsi yogikoneatimoigakairo
magatiro isuregetarira Tasorintsi**

⁶⁻⁷Kantankicha antari noniaigirira yogaegi kematsatasanoiganankitsirira ario pinkante nokamantageigiri posantepage yogotagaigakenarira Tasorintsi terira ogovetenkani pairani, yomanavetakarotari okyasanokyara isariaigakaira irogavisaa-koigakaera intentaiganakaera anta enoku ankantakanira antimaigake. Tera iroro nogotagantaige isuregeigarira matsigenkaegi, aikiro teratyo iroro isuregeigarira atinkamipage pogereagetanankichanerira impogini. ⁸Iriroegi tera irogoigeronika yogotagaigakairira Tasorintsi. Antari irogoigakerome gamerorokari ikentakotagantaigiri Atinkami pairorira yagaveavageti. ⁹Kantankicha ariotari okantakeri Itsirinkakagantakerira Tasorintsi okanti:

“Tasorintsi isuregetakaro posante tyarika inkantaigakeri tasanoi-garirira kameti inkavintsaavagakeriniri.

Teratyo tyani neimaterone,
aikiro teratyo onkemakotumatեն-
kani,

ontiri aikiro teratyo osuretumage-
tenkani.”

¹⁰Kantankicha aroegi yogikoneatimoi-
gakairo Isure Tasorintsi, yogotasannotake-
rotari magatiro isuregetarira Tasorintsi
terira ogotumatենkani itsotenkasanogeta-
kerotyo. ¹¹Kañotari matsigenka tera ario
intimurate goteronerira tatarika
isuretaka, panirotyo yogotakera irirori.
Iriromparorokarityo Tasorintsi garoroka-
rityo tyani gotumatatsi tatoita isuretaka,
panirotyo yogotakerora Isure. ¹²Aroegi
maika tenige asureigaempa kañotaka
isureigara terira inkematsaige, itiganka-
keritari Tasorintsi Isure intimasurentaiga-
kaera kameti agoigakeroniri isuregetaka-
rira isariaigakaira inkavintsaavageiga-
kaera iragaveakagaigakaera. ¹³Antari
nogotagantaigirora magatiro oka tera
tsikyata nogotagashiigemparo naroege,
intityo gotagaigakenaro Isure Tasorintsi.
Aikiro yogotagaigakena tyarika nonkan-
taige nogotagaigakerira itimasurentaigi-
rira. ¹⁴Yogari terira intimasurenteri tera
irishineventemparo yogotagaigakairira,
ineakerotari tera tatoita onkamentitantu-
matempa. Tera iragavee inkemavakerora,
teranika intimasurenterinika Isure
Tasorintsi irogotagakerira. ¹⁵Kantankicha
yogari itimasurentakerira iriro pinkante
ikemavakero, aikiro yogotakero. Yogari
terira intimasurenteri gara yagavei
irogotagakerira itimasurentakerira
inkamantakerira tatoita ikogake Tasorin-
tsi, teranika irogote. ¹⁶Ariotari okantakeri
Itsirinkakagantakerira Tasorintsi okanti:

“¿Matsi tyani gotakero isuregetarira
Atinkami kameti irogotagakeri-
niri?”

Kantankicha aroegi inti gotagaigakai
Isure Tasorintsi nerotyo agotantaigaka-
rorira isuregetarira Kirishito.

Yashirikovakagaiganakara kematsaigatsirira Korintokunirira

3 ¹Maika, napigematsaegine, nonkan-
taigakempi antari nokenkitsatimoi-
gakempira tera ario nonkañotagaigempi
nokenkitsatimoigirira kematsaigiririra
Isure Tasorintsi, ontityo nokenkitsati-
moigakempi nokañotagaigakempi
ikyakenkara kematsaiganankitsi,
kañogamatakavitari ananeki ikyarira
mechotankitsi. ²Onti nogotagaigega-
kempi terira onkomutempa nokañotagai-
gakempira itsomitagaganira ananeki
ikyarira mechotankitsi tekyarira intigen-
kani, tekyatanika pagaveaige pinkemai-
gavakerora komutankicharira. Kañotari
maika tekyanka pagaveaige pinkemai-
gakerora, ³tekyatanika pinkematsatasa-
noigeri Isure Tasorintsi, aiñokyatari
pikisumanavitantaigiro tyarika ikantai-
gaka papigematsaegine, aikiro pikisava-
kagaigaka pashirikovakagaiganakara.
Pisatyoniroyo pikañogirira tekyarira
inkematsaige. ⁴Aiñotari kantankitsirira:
“Naro inti nokematsati Pavoro.” Pashini-
kya kantankitsi: “Naro inti nokematsati
Aporoshi.” Pikañogakerora maika onti
pikañoganakari terira inkematsaige.

⁵¿Matsi tyanimpatyora Pavoro? Ario
ikañotaka Aporoshi, ¿tyanimpatyora
irirori? Intagatitari nogotagaigakempi
kameti pinkematsaigakerira Atinkami.
Paniropage notsatagageigakero ikantai-
gakenarira Atinkami, nantiegitari
iromperaneegi Tasorintsi. ⁶Narori
kañomataka ontinirikatyo nopankitakero
okitsoiki turigo, naketyotari kenkitsati-
moigakitimpi Iriniane Tasorintsi. Yogari
Aporoshi kañomataka irironirikatyo
sagutakotakero, irirotari gotagasanoiga-
kempi, kantankicha paniro Tasorintsi
ikematsatagaigakempira impo ishintsita-
gaigakempi ariompaniri pinkematsatasa-
noiganakeriri. ⁷Tera onkomutempa

opankitaganira okitsoki, aikiro osaguta-kotaganira, kantankicha panirotyo

Tasorintsi yagaveakera ishivokakagirora.

⁸Yogari pankiigatsirira intiegiri sagutakoigirorira ario ikañovakagaigaka, kantankicha impogini impunataenkani paniropage akarika yantavageigake.

⁹Naro ario nokañotakari Aporoshi, irirotari notentashita nantavageiginirira Tasorintsi. Viroegiri onti pikañoigakaro itsamaire Tasorintsi, aikiro onti pikañoi-gakaro ivanko yovetsikanakerira.

¹⁰Narori nanti kañotakana pairorira yogoti yovetsikavagetira pankotsi, ikogakagakenatari Tasorintsi nogakerora savi onkusotantakemparira, impo pashini-kya vetsikavakerone. Kantankicha paniropage vetsikavakerorira inegintetake-rora ganiri ikomutaro. ¹¹Gara tyani gaveatsi irogakera pashini onkusotanta-kemparira, matakataro nogakero, intitari okantakotake Jesokirishito. ¹²Kantankicha yogaegi vetsikaigavakeronerira inkonoga-garantaigakempa irovetsikantaigakemparo kori, intirika perata, ontirika kametiripage mapu. Pashinikya onti irovetsikantaiga-kemparo inchato, ontirika savorokii, aikiro ontirika oshi. ¹³Antari impogini aganakempara kutagiteri inkantantakem-parira Tasorintsi tyara inkantaigakenkani maganiro matsigenkaegi, ario oneaken-kani tatoita yovetsikantakaro paniropage. Irirorika yovetsikantakaro kori intirika perata ontirika kametiripage mapu garatyo otagirotsi, kusotaketari. Kantankicha ontirika yovetsikantakaro inchato, ontirika savorokii ontirika oshi ontagakempatyo. ¹⁴Antari garika otaga yovetsikakerira impunatakenkanityo.

¹⁵Antari ontagakemparika onti amparata-kempa magatiro yovetsikakerira, kantankicha irirori gara itaga onti irogavisaakotakenkani.

¹⁶¿Matsi tera pogoige viroegi vintiegi ivanko Tasorintsi, itimimoigakempitari

Isure? ¹⁷Tyanirika pakuakagaigakempine ganigera pitentavakagaigaa onti pinkisavakagaiganakempa pashirikovaka-gaiganakempara, inkisashitakemparityo Tasorintsi, yashintasanoigakempitari vintiegitari ivanko. ¹⁸Gara tyani matavitu-matacha. Añorika kara viroegiku neankicharira yogovagetakera ikañoi-gakara yogovageigira terira inkematsaige kantetyo ineakempara ikiiro tera irogotumate inkantakerira Tasorintsi irogotagakerira impo ovashi irogotasano-vegetanake. ¹⁹Magatirotari yogoigirira matsigenka ineakero Tasorintsi tera tatoita onkamentitantumatempa. Aityo otsirinka-kotunkani okanti: “Yogari Tasorintsi katsiketyo ikomutagaigari govageigatsirira yamatavitantavageigira impo ipogereiga-keri.” ²⁰Aikiro okanti: “Yogari Atinkami ineakero magatiro isuregeigarira govagei-gatsirira tera tatoita onkamentitantumatempa.” ²¹⁻²²Nerotyo maika nonkantantai-gakempirira intagati pikañoiigiro maika pinkantaigakera: “Naro inti nokematsaigi Pavoro”, pashinikya kantaigankitsi: “Inti nokematsaigi Aporoshi”, impo pashini kantaigankitsi: “Inti nokematsaigi Perero”, kañoiagamatakanatari vintieginirikatyo shintaigana, viroegitari itigankaviigakena Tasorintsi nogotagaigakempira. Irirori yashintakagaigakempiro magatiro yovetsikagetakera. Ario okañotaka aikiro viroegi shintaigakaro magatiro timagetan-kitsirira maika ontiri aikiro timagetankitsi-nerira impogini, irirotari paigakempiro Tasorintsi. Arirorika pintimaigake ontirika pinkamaigake garatyo tatoita gaveimai-gimpi, ²³intitari shintaigimpi Kirishito, irirokya Kirishito inti shintakari Tasorintsi.

Irantane iritigankaneegi Jesokirishito

4 ¹Irorotari maika nonkantantaigakem-pirira gara paventakoiwana naroege, pogoigakenatari nantiegi iromperaneegi Kirishito, ikogakagaigakenatari nogotagai-

gakempirora isuregetarira Tasorintsi terira ogotumatenkani. ²Tyanirika ikogakagunkani inkañotakempara maika intagati okogunkani intsatagasanotakerora magatiro ikantakeririra kogakagakeririra. ³Kañotari naro tera ario nosuretemparo tyarika pinkantaigakena ariorika notsatagakero ikantakenarira Atinkami ontirika tera. Viroegirika kantaigakenane intirika kantaigakenane pashini, gara tyara okantana. Kañotari naro teraty naro kantachane ariorika notsatagakero ontirika tera. ⁴Noneavetakaty naro notsatagakerora, kantankicha impaty Atinkami. Tsikyatyaty inkantakena irirori. ⁵Irorotari nonkantantaigakempirira maika gara tsikyata pikantaigiri viroegi papigematsaegine ariorika itsatagasanogakero ikantakerira Atinkami ontirika tera. Antari iripokaatera irirori ario pinkante irogikoneagetakero managevetankicharira ovashi ogotakenkani tatarika isureigaka paniropage, impo yogari Tasorintsi irishineventasanotakempari maganiro tsatagasanoigakerorira ikogage-tirira irirori inkantaigakerira: “Kameti-take.” Kantankicha yogaegiri tesakonarira intsatagasanoigero gasakona ishineventai-gari.

⁶Napigematsaegine, magatiro oka nokantakerira maika noniakotakara naro ontiri aikiro noniakotakerira Aporoshi onti nokantaigakempi kameti pogoigakeniri pintsatagaigakerora Itsirinkakagantakerira Tasorintsi ganigera itimai paventakoiagakemparira pashinikya pinkisaigake. ⁷¿Matsi tyanityora neaigakempi pavisaigakerira pashini? ¿Matsi tatatyto pagaveakera viro tsikyata terira iro gaveakagempirone Tasorintsi? Irirorika gaveakagakempi iroroventi ¿tyara okantakara paventakovagetakara kañomataka tsikyatanirikatyo pagaveashitakaro viro?

⁸¿Matsi mataka gotasanovageigakevi magatiro tera pinkogakotumaigaempa irogotagaitaempira? ¿Matsi mataka gaveasanovageigakevi? ¿Matsi pegaigakavi koveenkariegi pavisaiganakena naroeqi? ¡Arisanomeratyto pimpegasanoi-gakempa koveenkariegi kameti nomaigakempara naroeqi nontentaigakempira! ⁹Noneaketari naroeqi iritigankaneegi Atinkami kañomataka ontinirikatyo ikañotagavageigakena Tasorintsi terira impaitumaigempa ikantakagantaigunkanirira irogakagantaigakenkanira, nerotyto yogaiganakena kavako maganiro matsigenkaegi intiegiri aikiro isaankariite Tasorintsi ipampogiaiganakenatyto sorererere. ¹⁰Naroeqi nokenkitsatakoigakeri Kirishito nerotyto ineantaigakenarira terira inkematsaige tera nogotumaige, kantankicha viroegi pineaigakera pikematsaigakerira Kirishito ovashi pineaiganakariori pogovageigake. Naroeqi onti ineaigakena tera nagaveimaige, kantankicha viroegi pineaigaka pagaveavageigakera. Vintiegi ishineventaigaka, naroeqi tera irishineventaigena. ¹¹Omirinka natsipereavageigake notasegane ontiri nomire, aikiro notsonkasetakovageigaka kigonkero maika. Ipasapasavageitakena, aikiro ikantaitakena onti nanuivageigake kogapage tera ontimaige novanko. ¹²Natsipereavageigaketyo kara nantava-geigira. Yovosanteavageitakenatyto kantankicha naroeqi teratyto nompugai-gempari onti nokantaigakeri Tasorintsi inkavintsajaigakerira. Yatsipereakagaveitakenatyto kantankicha natsipereakova-geigaketyo. ¹³Inishinavageitakenatyto kantankicha naroeqi kametikya noniaigakeri. Ikisavintsavageitakenatyto kara, pairotyto yovashigakovageitakena kigonkero maika.

¹⁴Tera iroro nontsirinkaviigempi nogipashiventaigakempira, ontityo nokogake nonkanomajaigakempira

nonkañotagaigakempira vintieginirikatyo notomiegi notasanoigarira. ¹⁵Intimageigavetakempatyo 10,000 gotagaigakempinerira pinkematsatasanoigakerira Kirishito kantankicha garatyo itovaigi tomintaigakempinerira, panirotari nokantakara naro notomintaigimpira, narotari kematsatagaigakempi okyasanokyara nokenkitsatakotakerira Kirishito nokamantaigakempira tyara ikanta yogavisaakotantira.

¹⁶Nerotyo maika nokogantakarira pinkañotasanoigakenara naro. ¹⁷Irorotari nontigankantakemparirira maika Timoteo inkamosoigutempira. Irirori onti nopegasanotakeri notomi notasanovagetakarityo kara. Omirinka ipiriniventasnovagetiro ikogagetirira Atinkami. Antari iriatakera kara isuretagaigaempiro tyara nokanta naro nokematsatirira Kirishito nogotagantavagetira tyarikara kara yapatovageigara kematsaigatsirira.

¹⁸Pikonogagarantaigaka viroegi paventakovageiganaka pineaigiri gari noati noneaigaatempira. ¹⁹Kantankicha irirorika kogankitsine Atinkami noataketyo shintsi ovashi noneaigakiteri yogaegi ventakovageigankicharira arisanorika yagaveavageigake ontirika iniashivageigakaro kogapage. ²⁰Omirinkatari itinkamiantara Isure Tasorintsi tera intagati iriniakagante kameti, ontityo yagaveakaganti aikiro. ²¹¿Tatoita pikogaigake viroegi? ¿Ario pikogaigake nonkanomajaigakitempira ontirika noshineventaigapaempira kametikya noniaigapaempi?

**Ikantaigakerira tyara inkantaigakeri
vetsikankitsirira terira onkametite**

5 ¹Maganiro ikemakoigakempi itimakera paniro papigematsaegine parantakarorira yagavetarira iriri yagakerora, impo viroegi tera tyara pinkantumaigeri. Okari kañorira maika

teratyo onkametitumate, kañotari terira inkematsaigeri Tasorintsi ineaigirotyo iriroegi aikiro tera onkametite ikantaviantaigiro. ²Tyarikatyo pikantaigaka viroegi ventakovageigamatakavi, pinkenkisureimaigempatyo pinkantaigakerira kañotakerorira maika ganigera itentaigaimpi. ³Teratyo ario nontentaigavetempi, kantankicha nosuretaikoigakempityo kañomataka ontinirikatyo notentagakempi. Yogari kañotakerorira maika mataka nokantake onti yovetsikake terira onkametite. ⁴Irorotari nonkantantaigakempirira maika tyara inkantakenkani kañomataka intinirikatyo kantankitsi Atinkami Jesokirishito. Pampatoitaigakempara pogoigaketari aña nosuretaikoigakempi, aikiro iragaveakagaigakempi Atinkami Jeso ⁵pinkantaigakerira ganigera itentaigaimpi papatoitapiniigara kameti iratsipereakagasanotakeriniri Satanashi irapakuaeroniri yovetsikakerira maika impo irogavisaakotakenkani impogini impigaatera Atinkami Jeso.

⁶Tera onkametite paventakoigakemparora pikañoigakerora maika. ¿Matsi tera pogoigero okantaganira: “Antari ovetsikaganira pan onkonogumatakenkanira maani opoegantarira ogatyo onkenake ompoeganake magapatsatiro”? ⁷Maika pinkantaigakerityo yoga kañotakerorira maika ganigera itentaigaimpi kameti pinkañoigaemparoniri pan terira onkonogenkani opoegantarira. Irirori ontitari ikañotakaro ogantagarira opoegantarira pan. Antari garika pikañoigiri maika onti impaenkaiganakempi viroegi aikiro pinkañoiganakemparira irirori. Viroegi ontitari pikañoigakaro oga pan terira onkonogenkani opoegantarira ogaganirira Pasekoaku, ikamaventaigakaitari Kirishito isaankakerora akañovageigara ikañotakarira ovisha yogaganirira Pasekoaku.^a

⁸Iroventi maika tsame ampakuasanoiganakerora magatiro terira onkametite anegintetasanovageiganakempara, ankantagantsivageiganakera ganigera amatavitantavageigai.

⁹Antari notsirinkaigakempira karanki nokantaigakempi gara pikonoitumaigari atashiigirorira tsinane. ¹⁰Kantankicha tera iriro nonkantaige yogaegi terira inkematsaige atashiigirorira tsinane, intirika kogaigatsirira irashintavageigakempara, intirika koshintiegi intirika pegageigiririra pashini itasorintsite. Antari iriromera nonkantaigakeme ario tyaratyo piaigakera kara kameti ganiri pikonoigari. ¹¹Intityo nokantake yoga kantatsirira: “Nanti papigematsatene”, kantankicha aiñokya iatashitiro tsinane, ontirika aiñokya ikogi irashintavageigakempara, ontirika ipegake pashini itasorintsite, ontirika aiñokya iniaigisevagegi, ontirika aiñokya ishinkivagegi, aikiro ontirika aiñokya ikoshivagegi. Irirori pinkante nokantakeniroro garatyopitentumaigari pisekataigakempara. ¹²⁻¹³¿Matsi tyara nonkantaigakerira yogaegi terira inkematsaige? Impatyotasorintsi tsikyatyato inkisashiigakempari irirori. Kantankicha viroegi pinkantaigaketyo tyara inkantaigakenkani papigematsaegine vetsikaigatsirira terira onkametite. Irorotari nonkantantaigakempirira maika pinkantaigakerira yoga gakerorira yagavetarira iriri ganigera ikonoivageigaimpi papatoitapiniigara.

Gara yaventangani joese terira inkematsate

6 ¹Ariorika pinkisakeri papigematsatene pineakera tyarika ikantakempi ¿matsi ario okametitake piatakera pinkamantakerira joese terira inkematsate kameti inkantakera tyarika inkantakenkani yoga pikisakerira? Irirompatyo pinkamantaigake papigematsaegine kameti inkantaigakempiniri

tyarika inkantakenkani. ²¿Matsi tera pogoige viroegi yogaegiri kematsaigiririra Tasorintsi iriro kantaigankitsine impogini tyara inkantaigakenkani maganiroro matsigenkaegi? Antari ariorika pinkañoigakempa maika pairorokari pagaveaigake pinkantaigakera maika tyarika inkantakenkani tyanirika tsimaakeri irapigematsatene. ³¿Matsi tera pogoige aroegi kantaigankitsine tyarika inkantaigakenkani isaankariite Tasorintsi? Agoigaketari ario onkañotakempa maika impogini, iroroventi maika pairorokari agaveaigake ankantaigakera tyarika onkantenkani tatapagerika aneaigake tera onkametite. ⁴Ariorika pikisavakagaigakera tyarika pikantavakagaigakera ¿tyara okantakera intira paventaigakera terira iriroegi kematsaigatsirira inkantaigakera tyani kañotankicha? ⁵Maikari maika ario pinkante onti notsirinkaviigakempi oka nogipashiventaigakempira. ¿Matsi tera intimumate paniroro papigematsatene gotankitsinerira inkantakera tyara pinkantaigakempa pogametiavakagaigakempara? ⁶Nerotyo pikisavakagaigara inti paventaiga joese terira inkematsate.

⁷Antari pikañoigakera maika teratyotatyo onkametitumate. Ariometryo pantsipereakoigakemparome tyarika ikantaigakempi papigematsatene. Kañotari irapararutaigempirora tatarika pashintaka pantsipereakoigakempatyo. ⁸Kantankicha viroegi patsipereakagantavageigakera, pimaiganakerityo aikiro papigematsaegine iriroegi.

⁹⁻¹⁰¿Matsi tera pogoige maganiroro vetsikaigatsirira terira onkametite gara iaigi itimira Tasorintsi? Tsikyanira pikomuigarokari oka. Gatanika iaigi itimira Tasorintsi noshikantavageigatsirira, intiegiri pegaigiririra pashini itasorintsite, intiegiri atashiigirorira tsinane suraritakotankitsirira, intiegiri gaigiririra irapisurari-

tene, intiegiri koshintiegi, intiegiri kogaigatsirira irashintavageigakempara, intiegiri shinkisenariegi, intiegiri niagisevageigatsirira intiegiri aikiro matavitantaigatsirira. ¹¹Pikonogagarantai-gaka viroegi ario pikañoigaveta maika, kantankicha antari pikematsaigakerira Atinkami Jesokirishito pikantaigakerira irogavisaakoigakempira ario pinkante isaankakero magatiro pikañovageigakara, ineantaigakempirira Tasorintsi kañomataka tenirikatyo pinkañoavagetumaigempa, impo yagaveakagaigakempi Isure papakuasanoiganakerora povetsikagisevageigavetakarira ovashi pipiriniventaiganakero ikogagetirira irirori.

Kirishito yashintasanoigakari kematsaigiririra

¹²Aityo posantepage terira inkantavitenaro Atinkami, kantankicha garatyo novetsikiro tyatirika noneake naro onti ampakuakagakena nokematsatanotirira. Teratyo inkantavivetenaro irirori, kantankicha tyatirika noneake ariorika agaveakena impogini garatyo novetsikiro. ¹³Arisanoniroro yovetsikagetakero Tasorintsi magatiro ogagetaganirira kameti oatakera segutontsiku ankemai-gakempara. Ario okañotaka segutontsi irorori onti yovetsikashitakero oyagantakemparora ogagetaganirira, kantankicha impogini ganigetio okañotaa maika gatanika akogakoigaa asekataigaempara. Kantankicha aroegi tera iroro irovetsikashiigae Tasorintsi anoshikantavageigakera. Ontityo yovetsikashiigakai ankematsaigakerira Atinkami, irirokya Atinkami intimasurentaiga-kaera. ¹⁴Ariotari ikañotakeri Tasorintsi Atinkami yoganiairira, arioty inkañotagaigakae aroegi aikiro impogini iroganiaigajaera, yagaveavagetitari.

¹⁵¿Matsi tera pogoige viroegi yashintasanoigakempira Kirishito? ¿Tyara inkantakempara yashintarira Kirishito iriatashitakerora pogereiririra surari? iGaratyo ikañotumatiro maika! ¹⁶¿Matsi tera pogoige tyanirika atashitakero pogereantatsirira ogatyto ikenake itentaganotanakaro kañomataka panironirika-tyo inake? Ariotari okantakeri Itsirinkakagantakerira Tasorintsi oniakotakerira gankitsinerira itsinanetsite okanti: “Antari okyara tekyara iragero piteni inagave-taka, kantankicha antari yaganakerora oga ikenake itentaganakaro kañomataka panironirikatyo inai.”^b ¹⁷Ario ikañota tyanirika kematsatanotiri Atinkami itentasanotakari kañomataka patironirika-tyo onake isure.

¹⁸Garatyo piatashitumatiro tsinane terira iroro pashi pitsinanetsite, magatirotari ovetsikagetaganirira terira onkametite tesakonatyto tyara onkanteri vetsikakerorira, kantankicha yogari neakerorira pashini tsinane irirori pinkante pairotyo yogagaka yovegagatakara. ¹⁹¿Matsi tera pogoige viroegi itimasurentaigakempi Isure Tasorintsi itigankimoigakempirira irirori? Viroegi tenige pintimashiigaem-paro kogapage, ²⁰ikamaventaigakempitari Kirishito kameti irashintasanoigakempira Tasorintsi. Irerotari maika nonkantantagakempirira negintetasanoigempa kameti pineakagaigakeriniri maganiro pairo yagaveavageti irirori.

Ikamantageigakerira ikogakotagantageigakeririra

7 ¹Maikari maika irorokya nonkaman-tageigakempi pikogakotagantageiga-kenarira pitsirinkaigakenara. Kametiveta-katyto gara yagi surari tsinane. ²Kantanki-cha kameti ganiri oatashitagani tsinane kametitaketyo iragaigakera paniropage

surari itsinanetsite. Ario onkañoigake tsinaneegi irooegi agaigake osuraritsite.

³Ogari tsinane gara otsaneapitsatari osuraritsite inkogakerika ineakerora. Ario inkañotakempa irirori gara itsaneapitsataro irorori. ⁴Ogari tsinane suraritamotatsirira teranika ontimae kogapage, irirotari shintaro osuraritsite. Ario ikañotaka surari irirori onti shintakari itsinanetsite. ⁵Nonkantantaigakempirira gara pitsaneapitsavakagaiga, kantankicha pitenirorika pinkogaigake pampakuaigutera kameti pimpiriniventaigakerora piniaigakerira Tasorintsi kametitake. Impogini pagavakagaigaempa ganiri ikañovagetagaimpi Satanashi gatanika patsipereakoiga. ⁶Kantankicha nokantagakempira maika tera ario nonkantagempi pagaigakera tsinane, ontityo nokantaigakempi ariorika pinintaigake pagaigakera kametitaketyo. Antari garika pinintaigi kametitaketyo aikiro.

⁷Narori nokogavetakatyo inkañoigakenamera naro maganiro surariegi, kantankicha yogari Tasorintsi ikantagakageigakeri paniropage yagaveakagagakerira. ⁸Yogaegiri tekyarira intsinanetakoige kametivetaka intimaigakera kogapage inkañoigakenara naro. Ario onkañoigakempa tekyarira ojimentagempa ontiegiri ogamakotagaegi. ⁹Kantankicha yogaegiri terira iragaveaige iratsipereakoigempara kametitaketyo intsinanetakoigakera, pairotari avisake okametikatera intsinanetakoigakera avisakero inkoinantavageigakempara.

¹⁰Kantankicha ogaegiri suraritakoigankitsirira nonkantagakero gara okaigiri ojime, teranika naro kantatsine, intityo kantankitsi Atinkami. ¹¹Antari okanakeririka ojime garaty o gumatai pashini, kantankicha onkogakerika ompigashitaemparira ojime kametitaketyo. Ario inkañoigake surariegi garaty iokumai-giro itsinanetsite.

¹²Maikari maika irirokya noniaigake kematsaigatsirira timaigankitsirira itsinanetsite terira onkematsate, kantankicha tera iriro kantatsine Atinkami, nantityo kantankitsi. Nonkantaigakeri otakaririka itsinanetsite garaty iokiro. ¹³Ario onkañotakempa tsinane kematsatsirira aiñorika osuraritsite terira inkematsate itakarorika garaty okiri. ¹⁴Irirori teraty inkematsavetempa, kantankicha okematsataketeri irorori irorotyokametitagakerine ovashi intentagantakempari Tasorintsi inkavintsaavagetakemparira. Ario okañotaka aikiro tsinane terira onkematsate irirorika kematsatankitsi osuraritsite irirotyo kametitagakerone ovashi intentagantakempari Tasorintsi inkavintsaavagetakempari. Gamera okañota maika yogari itomiegi inkañotasanomaigakemparime itomiegi terira inkematsatu-maige, kantankicha maika intityo kametitagaigakeri iriri kematsatsirira neroty okavintsaantavageigakeririra Tasorintsi. ¹⁵Kantankicha aiñorika terira inkematsate irirorika kogankitsine iokanaerora itsinanetsite kematsatsirira kametitaketyo ampakuaerira. Ario okañotaka tsinane terira onkematsate irororika kogankitsine okanaerira osuraritsite kematsatsirira kametitaketyo irapakuaerora. Ikogaketari Tasorintsi antimagantsivageigakera kameti. ¹⁶Virori tsinane, ¿matsi pineaka pagaveake pinkematsatagakerira pisuraritsite? Ario pikañotaka viro surari, ¿matsi pineaka pagaveake pinkematsatagakerora pitsinanetsite?

¹⁷Tyaririka pikantaka okyara ikematsatagakempira Tasorintsi kantakaty pinkañotakempara maika, irirotari kogakagakempi pinkematsatakerira. Ariotari nokañoigiri maika nokantaigirira maganiro kematsaigatsirira patoven-taigaririra Tasorintsi parikotipageku.

¹⁸Matakarika ogaratsaitunkani pichonki-

rimeshinate ikematsatagakempira Tasorintsi kantakatyo pinkañotakempara maika. Antari terika ogaratsaitenkani ariotyo onkañotake aikiro kantakatyo pinkañotakempara maika garatyo pogaratsaitaganta. ¹⁹Teranika iroro irishineventempa Tasorintsi ineakempira ogaratsaitunkanira pichonkirimeshinate ontirika tera ogaratsaitenkani, ontityo ishineventasanota pimpiriniventakerora ikogagetirira irirori. ²⁰Irorotari nokantantakarira tyarika pikantaka okyara ikematsatagakempira Tasorintsi kantakatyo pinkañotakempara maika. ²¹Ariorika yonampiitakempi okyara ikematsatagakempira Tasorintsi garatyo povankinaventaro tyarika pinkantakempa pintimashitakemparora kogapage, kantankicha inkogakerika nampitimpirira irapakuakempira kametitaketyo piataera parikoti. ²²Maganirorotari nampiriantsi ikematsatagakakerira Tasorintsi kañomataka ontinirikatyo itimakagairi kogapage, tenigetari irashintaempari kamagarini. Irirokya timashitarorira kogapage iroro ikematsatagakakerira Atinkami tenige intimashitaemparo kogapage, yashintanakaritari Atinkami ipegasanotakeri ironampira. ²³Irirori ikamaventaigakempitari kameti irashintasanoigakempira Tasorintsi. Maikari maika tsikyanira yapakuakagagimpikari tyanirika pashini ganigera pipiriniventaigairo ikogagetirira Tasorintsi. Antari pinkañoigakemparika maika kañomataka ontinirikatyo yonampiitaimpi. ²⁴Irorotari nokantantaigakempirira tyarika pikantaigaka okyara ikematsatagaigakempira Tasorintsi kantakatyo pinkañoigakempara maika pintentasanoigakemparira irirori, imo irirokya tentasanoigakempine.

²⁵Maika irirokya nonkantaigake tekyarira intsinanetakoige, kantankicha teratyo iriro kantenane Atinkami

nonkantaigakerira, tsikyatatyo naro nonkantaigakeri, noneaketari itsarogakagakenara Atinkami yagaveakagakena nonkematsasatanovagetakerira. ²⁶Naro noneakero kametivetaka gara yagi tsinane tekyarira intsinanetakote, noneaketari atsipereavagetanunkanira maika. ²⁷Kantankicha aiñorika pitsinane-site garatyo pikogi pokanakerora. Antari terika ontime garatyo pikogi pagakera. ²⁸Kantankicha pagakerika kametitaketyo, garatyo ikisavitimpiro Tasorintsi. Ario okañotaka tsinane irorori agakerika surari kametitaketyo aikiro. Kantankicha tyanirika gankitsinerira itsinanetsite iratsipereavagetaketyo posante. Nokogavetaka gasakonara patsipereaigi, irorotari nokantantaigakempirira maika.

²⁹Napigematsaegine, onti nokantaigakempi maika noneaketari gara samani agaveaigi antavageigakenerira Atinkami. Irorotari nonkantantaigakempirira maika yogaegiri tsinanetakoigankitsirira garatyo intagati isuretakoiga itsinanetsite, ontityo isuretasanoigakempa tyarika inkantaigakempa impiriniventaigakerora magatiro ikogagetirira Atinkami. ³⁰Ario inkañoigakempa yogaegi kenkisureavageigankicharira impiriniventaigakerora ikogagetirira Atinkami kañomataka tenirikatyo inkenkisureaigempa. Ario inkañoigakempa aikiro shinevageigankicharira. Iririoegikya tyanirika shintaigankicha tatarika oita garatyo iroro ishineventasanoiga, kañomatakatar tenirikatyo irashintaigemparo, gatanika ikantakani yashintasanoigaro. ³¹Ario inkañoigakempa aikiro shineventaigarorira kametiripage timagetatsirira aka kipatsiku, garatyo intagati iroro ishineventaiga, gatanika okantakani otimi.

³²Tera nonkoge pisuretakovageigakemparora posantepage povankinaventavageigakemparora. Yogari terira intsinaneta-

kote intagati isureta kogeta impiriniventerora ikogagetirira Atinkami kameti irogishineakerira. ³³Kantankicha yogari timatsirira itsinanetsite isuretakotakaro aikiro timagetatsirira kipatsiku ontiri aikiro tyara inkantakempa irogishineakerora itsinanetsite. ³⁴Ario okañotaka aikiro tsinane timatsirira osuraritsite tera onkañotemparo terira osuraritakote.

Ogari terira osuraritakote intagati osureta kogeta ompiriniventakerora ikogagetirira Atinkami. Kantankicha ogari suraritakotatsirira osuretakotakaro aikiro timagetatsirira kipatsiku ontiri aikiro tyara onkantakempa ogishineakerira osuraritsite.

³⁵Antari nokantaigakempira maika tera ario nonkantaviigempiro pagaigakerora pitsinanetsite, intagati nokantaigakempi paio avisake okametitakera pintimaigera kogapage ganiri tatoita pisuretumaiga pashini, intagatityo pimpiriniventaigake ikogagetirira Atinkami pinegintetasanova-geigakempara pintimaigakera kameti.

³⁶Tyanirika timankitsine igashigane antarotasano tanankitsirira impo ineakerika kametitake iragakerora ganiri ikoritashitaro kogapage kantetyo iragakerora, teranika inkantavitantero Tasorintsi. ³⁷Kantankicha aiñorika pashini onti ineake kametitake gara yagiro, aikiro mameri tatampa onkenantakempa iragakerora, kametitakettyo gara yagiro. ³⁸Neroty nonkantantaigakempirira maika tyanirika gankitsine tsinane kametitakettyo, kantankicha yogari garira yagi pairotyo avisake okametitakera.

³⁹Ogari tsinane suraritakotatsirira tera onkametite okakerira osuraritsite, kantankicha antari ogara inkamake ario pinkante kametitakettyo agaera pashini tyanirika onintake irorori, kantankicha intityo agake apigematsatene. ⁴⁰Kantankicha naro noneake paio avisake oshinevagetakempara garika agai pashini, aikiro noneake iriro kantakena Isure Tasorintsi.

Ivatsa ipunkanirira ipegagetaganirira tasorintsi kogapage

8 ¹⁻²Maikari maika irirokya noniako-take ivatsa piratsipage yovetisunkanirira ipunkanirira ipegagetaganirira tasorintsi kogapage. Pikantasanoigakeni-ro maganiro agoigavetaka tatoita kametitankitsi, kantankicha maika nonkantaigakempi tyanirika neankicha yogovagetityo kara tekyatyo irogotasano te note ontityo yaventakovagetaka. Antari aventakovageigakempara, ¿matsi tyara ankantaigakempara ashintsitagaigakerira apigematsaegine? Kantankicha arisanora ompaitakempa antaigakemparira ario pinkante ashintsitagavakagagakempa kameti ankematsatanoigakeniri. ³Kantankicha yogari Tasorintsi yogotasano tiyani tasanotari.

⁴Maika noniakotaeri ivatsa piratsipage yovetisunkanirira ipunkanirira ipegagetaganirira tasorintsi kogapage. Aroegi agoigaketari maganiro ipegagetaganirira tasorintsi kogapage teratyo tatakona iragaveimate, panirosano tyo ikantakara Tasorintsisanorira itimakera yagaveavagetakera. ⁵Intimavetakempatyo anta enoku inkiteku ontiri aikiro aka kipatsiku tovaini ipegagetaganirira tasorintsi intiegiri koveenkaripage, ⁶kantankicha aroegi agoigakettyo mameri pashini Tasorintsisanorira, panirotyo ikantakara Apa Tasorintsi itimakera. Irirotari vetsikagetakero magatiro timagetatsirira, aikiro aroegi onti atimashiigake ampiriniventaigakerora magatiro ikogagetirira. Aikiro aiño panirosano Atinkami Jesokirishito. Irirotari itentaka Tasorintsi okyasanokyara yovetsikageigakerora magatiro, aikiro iriro gavisaaokigakai aroegi yoganiaigakaira.

⁷Yogoigavetakaty maganiro arisano nokantasano take kantankicha aiño ikonogagarantaigaka yogaegi gameiga-

vetacharira yaventaigarira itasorintsie-gite aiñokyatyo ipinkaigiri irogaigakem-parira ivatsa ipunkanirira ipegageigave-tarira itasorintsiegite, ineaiagaketari irogaigakemparirika onti irovetsikai-gake terira onkametite, kañomatakatarir ontinirikatyo yaventaiganaari aikiro.

⁸Yogari Tasorintsi gara iroso ishinevii-gajai tatarika agaigakempa, gatanika iroso kametitagasanoigajai agaigarira, aikiro gara iroso kañotagantaigajai.

⁹Kantankicha antari pikantaigakera kametitake irogakenkanira ivatsa ipunkanirira ipegagetaganirira tasorintsi kogapage tsikyanira pikañovagetagaigari-kari papigematsaegine tekyasanorira irogoige. ¹⁰Pine ariorika ineakempi papigematsatene tesakonarira irogote sekatakavi ivankoku ipegavetarira itasorintsie impo ariorika inkogake irimatakempara irirori, ineakempitari vinti irapigematsatene. ¹¹Ariorika inkañotakempa maika virotyo kañotagantakeri, virotari ineakotake pikañotakerora maika ovashi irapakuanakero ikematsavetakara. Vironiroro kañotagantakeri papigematsatene ikamaventakerira Kirishito. ¹²Antari pinkañotakemparika maika pinkañovagetagakemparira papigematsatene tekyasanorira irogote yogari Kirishito ineakempi onti povetsikake terira onkametite, irirori teranika inkoge ankañovagetagaigemparira apigematsaegine, ontityo ikogake antasanoigakemparira. ¹³Pine naro noneakerika onti nonkañovagetagakempari napigematsatene nogarira ivatsa irosoventi garatyo nogumatari ganiri nokañovagetagari.

**Tyara ikanta Pavoro ipiriniventirora
ikogagetirira Tasorintsi**

9 ¹Narori nanti iritigankane Atinkami Jesokirishito, noneakeritari, aikiro irirotari tigankakena nonkenkitsatimoigakempira pikematsatantaigakaririra,

neroty nagaveaketyo novetsikakera tatarika oita terira inkantavitenaro irirori. ²Ariorika aiño pashini terira inkogaige inkantaigakenara iritigankane Kirishito, kantankicha viroegi pogotasanoigaketyo iroso tigankakena, narotari kematsatagaigakempi. Antari gamera iroso tigankana ario tyara nonkantakempara nagaveakera tsikyata nonkematsatagaigakempira.

³Maika nonkantaigakeri yogaegi niashinaigakenarira, ⁴kametiivetakatyo impaitakenara kogapage noseka ontiri nomire tyarika kara nonake nokenkitsati-motantavagetakera. ⁵Aikiro kametiivetakatyo nagakera tsinane kematsatasanotatsirira nontentavagetakemparora nonkañoi-gakemparira pashini iritigankaneegi Atinkami intiegiri irientiegi intiri aikiro Perero, kantankicha tera ario nonkañotero maika. ⁶¿Matsi pineaigiri ariori intagani naro intiri Verenave nantavageigakera nompunaventaigakerora noseka ganiri ipaitana inkañotagaitakenara notovaireegi iritigankaneegi Atinkami ipaigunkanira?

⁷¿Matsi tyara ineagani soraro kara impunaventakera tsikyata irirori iseka? Ario ikañota pankitirorira ova ¿matsi ario ipankitiro kogapage tera irogemparo? Ario ikañotaka sentiririra ovisha irirori, ¿matsi ario inkantavitenakenani iroviika-kemparora itsomia? ⁸Maika ariorika pineaigake viroegi intagati noniakogetake yogameigarira matsigenkaegi, kantankicha naro nonkantaigakempi ariotyo okantake aikiro Iriniane Tasorintsi, ⁹okantaketari itsirinkakotanakerira Moiseshi okanti: “Yogari toro gara yogusotsovatagani yagatikagitagaganira turigo isaakitakerora okitsoki.” Antari okantakera maika, teraty intagani intsarogakagempa Tasorintsi toropage, ¹⁰ontityo itsarogakagaigakena aikiro naroege tavageiginiririra. Neroty yoga kigashitirorira turigo impankitakera yogotake impaenkani impogini ontimana-

kera. Ario ikañotaka kuagitirorira irirori yogotaketyo impagarantaenkani. ¹¹Maika nareogi nokenkitsatimoigakempira Iriniane Tasorintsi kañomataka ontinirika-tyo nopankiigakero Iriniane pisureegiku. Antari noneviigempira pimpaigakenara tatarika oita nokogakoigaka imatsi pineaigakero viroegi tera onkamentite? Kametivetakatyo, kañotari ipagarantaganira pankivaagetatsirira ipagarantunkani-tyo. ¹²Kañotari pipagarantaigirira pashini kenkitsatimoigimpirira pipagarantaigake-rityo, narompaegirorokari paio pimpaga-rantaigakena.

Kantankicha nareogi teratyo nonkantu-maigempi pimpagarantaigakenara tatarika oita, ontityo natsipereakovagei-gaka ganiri tyani kantatsi onti nokenki-tsatakotakeri Kirishito impunaitakenara impo ovashi gara ikogi ikematsatira. ¹³Viroegi pogoigitaro maganiro tavagei-gatsirira ivankoku Tasorintsi yogagaran-taigaro magatiro amapinigetaganirira impakenkanira Tasorintsi. Pine yogaegiri piriniventaigiririra itagaigirira ivatsa piratsipage ipunkanirira Tasorintsi yagagarantaigi yogaigarira, irirotari kantankitsi. ¹⁴Ario okañotaka maika inti kantankitsi Atinkami maganiro kenkitsai-girorira Niagantsi Kametiri kametitake impaigakenkanira tatarika oita ikogakoi-gaka, inti paigakerine yogaegi ikenkitsa-timoigakerira. ¹⁵Kantankicha nare teratyo nonkantumaigempi pimpaigake-nara tatarika oita nokogakotaka, aikiro maika teratyo iroto nontsirinkaviigempi nonkantaigakempira pimpaigakenara. Kañotari agenara notasegane agenataty, pairotari avisake noshineventasanoataka-rora nonkenkitsavagetakera kogapage gara tatoita nonevitantumati.

¹⁶Narori nokenkitsavagetirora Niagan-tsi Kametiri teratyo naventakotuma-tempa, intitari kantakena Tasorintsi nonkenkitsavagetakerora. Antari garika

nokenkitsatiro ityarikarorokari nantsipereavagetaketyo kara! ¹⁷Antari tsikyatamera nonkogake nare nonkenki-tsavagetakera ario pinkante nonkanta-kemetyo impunaitakenara, kantankicha tera ario onkañotempa maika, intitari kogakagakena Tasorintsi nonkenkitsava-getakera. ¹⁸Pine maika nokantaiga-kempi ikantavetakara Atinkami maganiro kenkitsaigirorira Niagantsi Kametiri kametitake impaigakenkanira tatarika oita ikogakoigaka, kantankicha nare tera ario nonkañotero maika, ontitari gishineakena nonkenkitsavage-takera kogapage garatyo tyani punatana.

¹⁹Nerotyo maika teranika tyani punatenane garatyo tyani kantana tatoita nompiriniventake. Tsikyatatyo nare nokañotagavagetaka naronirika nampiriansi natsipereaventavageigake-rira maganiro nokogasanotakera nonkematsatagaigakerira. ²⁰Nare tenigetyo nogiatakovetaemparo itsirinkakotanakerira Moisesi, kantan-kicha antari notentaigarira napijorioegitene nokañotasanoigakaritoyo iriroegi nogiatakovetaarora kameti nonkematsa-tagaigakeriniri. ²¹Antari irirorika notentaigaka terira irogiatakoigero itsirinkakotanakerira Moisesi irirokya-tyo nokañoigaa kameti nonkematsata-gaigakerira iriroegi aikiro, kantankicha aiñokyatyo notsatagasanotiro ikogageti-rira Tasorintsi, nokematsatakeritari Kirishito. ²²Antari notentaigarira kematsaigatsirira tekyasanorira irogoie nokañoiganakaritoyo iriroegi kameti noshintsitagaigakerira ariompaniri inkematsatasanoiganakeri. Arioniroto nokañotakero maika tyanirika notentai-gaka onti nokañoigekakari iriroegi kameti nonkematsatagagarantaigakeri-niri irogavisaakoigakerira Tasorintsi. ²³Ontitari nokogake inkemaigakera

maganiro tyara ikanta Tasorintsi yogavisaakotantira, nerotyo nokañotan-takarira maika, aikiro nokogaketari nontentaigakemparira maganiro ikavintsajaigirira Tasorintsi noshineva-getakempara.

²⁴Viroegi pogoigitaritari antari ishigai-gara ineaigakera tyanirika visantanki-tsine itovaigavetakaty shigaigananki-charira, kantankicha impogini teratyo maganiro iramatsaiigenkani, panirotyo yamatsaitunkani yoga visantankitsirira. Maika viroegi pinkañoigakemparira yoga visantankitsirira pishintsitashigei-gakerora tatapagerika oita ikogakagai-gakempi Tasorintsi kameti irishineven-takempiniri impogini. ²⁵Maganiroitari kogaigatsirira iravisantaigakera irishigaigakera ineanovageigakaty kara kameti ishintiigakeniri irishigai-gakera ompote iragaveaigakera iravisantaigakera. Ireroegi onti ikogaigake iravisantaigakera kameti iramatsaiigakenkaniniri, kantankicha ogari iramatsaitantaigakenkanirira garaty okantakani okusoti, ontityo ontsonkatanaempa shintsi, kantankicha aroegi onti anegintetashiigaka kameti irishineventaigakaera Tasorintsi impaigakaera matsairintsisanorira garira otsonkatumata. ²⁶Irorotari noneantakarira naro nonegintevageta-nakatyo kara kameti ganiri tatoita kañovagetagana. ²⁷Ario nokañotakero maika nonegintetasanovagetanakara noshintsitashigetakerora magatiro ganiri tatoita pakuakagana nopiriniven-tasanotirora ikogagetirira Tasorintsi. Noneaketari naro gotagaigakeri pashini inkematsaigakerira, teratyo nonkoge inkantakenara impogini: “Tera noshine-ventempi.”

Ikantaigakerira gara ishineventumaigari ipegagetaganirira tasorintsi kogapage

10 ¹Maika, napigematsaegine, nokogake nosuretagaigaempi-rora tyara okantaka pairani inaigakera yashikiiganakairira anta osarigagiteta-paakera. Maganirosanotyo oivaigana-keri menkori ompote irononiri impam-piaiganake, aikiro maganirosanotyo imonteaignakaro Kiraamonkiari Inkaare opatuaatanakera nigankia opiriatanakera. ²Antari okañotakara maika kañomataka ontinirikatyo yogiviaigunkani kameti inkematsaigake-riniri Moiseshi irogaiganakerira. ³Ario okañotaka aikiro maganiro yogaigakaro manaa ipaigakeririra Tasorintsi. ⁴Aikiro maganirotyo yoviikaigakaro nia ipaigakeririra Tasorintsi yogikonteaiga-keneririra imperitaku. ⁵Ogari imperita inti okantakotake Kirishito tentavagei-gakaririra anta osarigagitetapaakera. ⁶Maganirotyo ineaigavetakaro magatiro oka, kantankicha yogari Tasorintsi ikisaigakeri tovaini ineaigakerira tera inkematsaigeri, ovashi ikamaigake anta osarigagitetapaakera. ⁷

⁸Ario okañotaka maika kameti aneaigakerora aroegi ganiri akañoigari iriroegi ankogaigakera avetsikaigake-rora terira inkogero Tasorintsi avetsikai-gerora. ⁹Irorotari nonkantantaigakempi-rira viroegi maika gara pishineventu-maigari ipegagetaganirira tasorintsi kogapage pinkañoigakemparira iriroegi, ikonogagarantaigakatari ishineventaiga-kari. Ariotari okantakeri Itsirinkakagan-takerira Tasorintsi okanti: “Iriroegi ipirinitaigake isekatavageigakara, aikiro yoviikavageigakara, impo ikaviriiga-naka itamporaventaigakerira itasorin-

c 10.1 Ek. 13.21-22; 14.21-22. **d 10.3** Ek. 16.35. **e 10.4** Ek. 17.5-6; Nm. 20.11.
f 10.5 Nm. 14.29-30; 32.13.

tsiegite.”⁸ Aikiro garatyo anoshikantu-maigi ankañoigakerira iriroegi inoshikantavageigakera ovashi ikamai-gake patiro kutagiteri 23,000. ⁹Ario okañotaka aikiro garatyo avetsikaigi tatarika oita aneaigakera ariorika inkisaigakae Atinkami ontirika gara. Ariotari ikañoigakari iriroegi pairani ovashi itigankimoigakeri maranke yagaigakerira impo ikamavioigake.^h ¹⁰Ontiri aikiro garatyo aniashitumaigari Tasorintsi ankañoigakerira iriroegi ikonogagarantaigaka iniashinaigakari ovashi itigankimoigakeri isaankariite ipogereaigakerira.ⁱ

¹¹Ario ikañoigakeri Tasorintsi maika maganiro yashikiiganakairira impo otsirinkakogetunkani kameti agoigakero-niri aroegi timaigankitsirira maika panikyara ontsonkagetanakempa magatiro. Ikogaketari Tasorintsi agoigakerora ganiri akañoigari iriroegi. ¹²Yogari neankicharira yagaveakera tsikyata ishintsitashitakerora terira onkametite kantetyo ineasanotakempara ganiri ikañoivagetaa. ¹³Tatarika oita pokashigeigimpi teratyto intagani ompokashiige viroegi, opokashiigirityo aikiro maganiro matsigenkaegi. Kantanki-cha Tasorintsi garatyto yovashigakoigimpi agaveaiganakempira, ontityo ishintsita-gaigakempi, aikiro irogotagaigakempi tyara pinkantaigakempa pishintsitashiiga-kerora ganiri agaveaigimpi.

¹⁴Irorotari nonkantantaigakempirira maika, napigematsaegine notasanoiga-rira, garatyto pishineventumaigari ipegagetaganirira tasorintsi kogapage. ¹⁵Onti nokantaigakempi maika nogotake-tari pinkemaigavakena, aikiro pogoigake pinkantaigakera ariorika nokantasano-take ontirika tera. ¹⁶Antari atentavaka-gaigara asekataigara asuretakoigara

Kirishito ikamaventaigakaira aniaigakeri Tasorintsi akantaigakerira ashineventai-gakaro vino kantakotakerorira iriraa Kirishito ovoatanakera ikamaventaiga-kaira. Antari akañoigara maika onti oneakenkanira atentavakagaigakara asuretakoigakarora iriraa saankakerorira akañovageigara. Ario okañotaka aikiro agaigarora pan kantakotakerorira ivatsa onti oneakenkanira atentavakagaigakara asuretakoigakarira ikentakotunkanira irogavisaakoigakaeniri Tasorintsi.

¹⁷Atovaigavetakatyto aroegi kematsaigiri-rira Kirishito kantankicha maganirotyto atentavakagaiga agaigarora patiro pan kantakotakeririra Atinkami, nerotyto maganiro aroegi gaigarorira atentavaka-gasanoigaka kañomataka panironirikatyto anaigake.

¹⁸Sureigaempari yogaegi iseraereegi tyara ikantaiga. Yogari gagarantaigari-rira ivatsa piratsipage ipunkanirira Tasorintsi intityo isuretakoiga Tasorintsi tyara ikanta ikavintsajaigirira. ¹⁹Iroro-venti çtyara nokanti maika? Tera ario nonkante arisano itasorintsitake yoga ipegagetaganirira tasorintsi kogapage, aikiro tera ario nonkante yogari ivatsapage ipagetaganirira ikantatigaka tera ario inkañotempari pashinipage ivatsa. ²⁰Ontityo nokantake yogaegi paigiririra ivatsa ipegaigakerira itasorin-site intityo ipanake kamagarinipage, teratyto iriro impe Tasorintsi. Narori teratyto nonkogumate pisuretakoigakem-parira kamagarinipage tyara pinkantai-gakerira pogishineigakerira. ²¹Antari aviikaigarora vino kantakotakerorira iriraa Kirishito ovoatanakera ikentakotunkanira garatyto irirokya aviikashiiga-vaka kamagarinipage. Ario okañotaka aikiro atentavakagaigara asekataigara asuretakotasanoigara Kirishito

ikamaventaigakaira garatyo agaveimaigi asekataigakempara asuretakoigakemparira kamagarini irirori.

²² ¿Matsi ario akogaigake antsimajai-gakerira Atinkami? ¿Matsi paio avisaigakeri irirori kameti ankañoigakempara maika?

Gara akañovagetagaigari apigematsaegine

²³ Arisanotyo aityo posantepage terira inkantaviigavetajaero Atinkami, kantankicha tyatirika aneaigake onti ampakua-kagaigakaero akematsasanoigirira Atinkami tera onkametite avetsikaigakerora. Teratyo inkantaviigavetajaero, kantankicha tyatirika aneaigake ariorika gara oshintsitagaigiri apigematsaegine inkematsasanoiganakera iroroventi garatyo avetsikaigiro. ²⁴ Gara paniro asuretakoiga akiro, asuretakoigakemparityo apigematsaegine aikiro. ²⁵ Kametitaketyo pogaigakemparira ivatsapage ipimantaganirira anta ipimantapinitaganira ivatsa gara pikogakotagantanaigiri tyarika yagunkani ganiri pisureigaro ariorika kametitake pogakemparira ontirika tera. ²⁶ Magatirotari kipatsi ontiri magatiro timantagetarorira inti shintaro Atinkami.

²⁷ Ariorika inkaemaigakempi terira inkematsaige isekatagaigakempira pimpintaigakemparika viroegi piaigaketyo, kantankicha pogaigakemparora tatarika oita impakoigakempi. Gara pikogakotagantaigiri ivatsa ariorika ipavetunkani ipegagetaganirira tasorintsi kogapage ganiri pisureigaro ariorika kametitake pogaigakemparira ontirika tera. ²⁸⁻²⁹ Kantankicha antari aiñorika kantaigakempinerira inkante: “Yokari yoka ivatsa ipavetunkani ipegagetaganirira tasorintsi”, ario pinkante garatyo pogaigari, ontityo pisuretakoigakempari

yoga kamantaigakempirira. Irirori ineaketari ariorika tera onkametite irogakemparira nerotyo ikantantakarira maika. Viroegi pogoigavetakempatyo gara tyara ikantaigimpi pogaigakemparira, kantankicha irirotyo pisuretakoigakempa ganiri pikañovagetagaigari.

Kantankicha ariorika aiño kantankitsinerira: “Tyarikatyo okantakara tera onkametite nogakemparira ivatsa ineakerira pashini ariorika tera onkame-tite irogakenkanira, teranika inkantavitantero Tasorintsi. ³⁰ Omirinkatari nogarira ivatsa noshineventari Tasorintsi noneaketari iriro pakenari, tyara onkantakempara inkantaitakenara tera onkametite nogakemparira.” ³¹ Maikari maika nonkamantaigakempi tyara okantaka. Magatiro tatarika oita povetsikaigake onti negintekya pogaigakero kameti irishineventakenkaniniri Tasorintsi, irororika pisekataigara ontirika poviikaigara ontirika aikiro tatapagerika oita pantaigi. ³² Garatyo pikañovagetagumaigari papigematsaegine. Aikiro garatyo povetsikumaigi tatarika oita ineaigakempira terira inkematsaige ovashi gara ikogumaigi inkematsaigakera iriroegi aikiro, irirorika jorioegi intirika terira iriroegi jorioegi. ³³ Ariotari nokañotari naro onti nokogasanoti nogishineaigakerira maganiro, teratyo nonkogumate nontsimaantakera, aikiro teratyo nakiro suretakotchane, intityo nosuretakoigaka pashini tyara nonkantaigakeri kameti irogavisaakoigakenkanira.

Tyara onkantakempa tsinane onierira Tasorintsi yapatoitaigara

11 ¹ Nokogake pogiatakoigakenara pinkañoigakenara naro nogiatakotirira Kirishito. ² Noshineventaigakempityo kara noneakera pikantakanira

pisureigana, aikiro pikantakanira pisureigakaro nogotagaigakempirira impo ario pikañotagaigakaro tyarika nokantaigakempi.

³Maika nokogake pogoigakera yogari surari inti inkematsatake Kirishito, irorokya tsinane inti onkematsatake ojime, ariotari ikañotakari Kirishito irirori inti ikematsati Tasorintsi. ⁴Nerotyo yoga surari irinierira Tasorintsi anta papatoitaigara ontririka inkenkitsatakero Iriniane garatyo ichokoita. Antari inchokoitakemparika kañomataka intinirikatyo ikematsatake irapimatsigenkatene, tera iriro inkematsatasanote Kirishito. ⁵Kantankicha ogari tsinane irorori pinkante onchokoitakempatyo onierira Tasorintsi ontririka onkenkitsaterora Iriniane. Antari garika ochokoita onti kañomataka tenirikatyo onkematsateri ojime, aikiro kañomataka ontinirikatyo ogaragitotunkani. ⁶Antari garika okogi onchokoitakempara kantetyo ogaragitotagantakempara. Kantankicha ompashiventakemparika ogaragitotagantakempara ontririka ompieitagantakempara iroroventi onchokoitakempatyo. ⁷Kantankicha yogari surari garatyo ichokoita, ariotari ikañotagakari Tasorintsi okyara yovetsikakerira, aikiro yavisakagakeri iravisakerora magatiro yovetsikagetakerira kameti irironiri oneantasanotakenkani arisano yagaveavageti Tasorintsi. ⁸Irorokya tsinane onchokoitakempatyo, irorotari oneantunkani antari yovetsikakerora Tasorintsi okyara inti yovetsikakene surari. ⁹Iketyotari yovamparoatake Tasorintsi surari impo yagakero imeretatonki yovetsikantakarora tsinane, teranika iroro oketyo irovamparoate tsinane. ¹⁰Ario okañotaka aikiro iketyotari yovamparoatake Tasorintsi surari impo yovetsikakeneri

itsinanetsite, teranika oketyo irovamparoate tsinane impo irovetsikakenero osuraritsite. ¹¹Irorotari maika kametitake onchokoitakempara tsinane kameti ineiaigakeroniri isaankariite Tasorintsi arisano okematsavagetiri ojime.

¹²Kantankicha antari akematsaigirira Kirishito irirori ineiaigakai ario akañovakagaigaka, teranika intimashitemparo kogapage surari. Ario okañotaka tsinane tera ontimashitemparo kogapage, pitenirotari ikogakovakagaigaka. ¹³Kaño-tari okyasanokyara yovetsikake Tasorintsi tsinane onti yovetsikantakaro imeretatonki surari ariotyo ikañogaka surariegi ontityo tomintaigari tsinaneegi, kantankicha intityo vetsikagetakero Tasorintsi magatiro. ¹⁴Antari garika ochokoita tsinane, atsi neaigeroratyo viroegi kametitakerika oniakerira Tasorintsi papatoitaigakara. ¹⁵Aroegi tera ameigemparo inkagishitera surari pashiventaniro-rokari. ¹⁶Kantankicha ogari tsinane iroro pinkante kametitaketyo onkagishitakera, irorotari oshineventa irorori, aikiro ontitari otimashitake ogishi ontikakotakerora ganiri osaamokoikiti. ¹⁷Kantankicha aiñorika kantankitsinerira tera ario onkañotempa maika nokogake irogotakera naroege iroro nameiga nokañogara maika. Ario ikañogara aikiro maganiroro kematsaigatsirira patoigeigacharira parikotipage.

Pavoro ikanomajaigakerira Korintokunirira

¹⁸Kantankicha antari nonkantaigakempira maika ario pinkante gara noshineventaigimpi ontityo nonkanomajaigakempi. Omirinkatari papatoitaigara tera pishintsitagavakagaigempa pinkematsatasanoiganakera, ontityo papakuakagai-ganakeri papigematsaegine ikematsaiga-

vetakara. ¹⁸Nokemakoigakempitari omirinka papatoitaigara tera pagavakaganoigempa. Naro nokanti arisanororokari. ¹⁹iAriotari okañotakari maika pashirikovakagaigakara pikogaigaketari oneakenkanira tyani paio yavisake ikematsatasanotirira Atinkami! ²⁰Nerotyo papatoitaigavetaka pisekataigakara pisuretakoigakempirira Atinkami tera ario pinkañotagaigemparo yogotagaigakairira irirori, kañomataka tenirikatyo iriro pisuretakoigempa. ²¹Teranika pogiyavakagaigempa pintentavakagaigakempara pisekataigakempara, onti pogapitsavakagaigaka pamageigakerira. Ikonogagarantaigaka tera inkemai-gempa, pashinikya onti yovashigaigakaro yoviikaigakara niganki ishinkiiganaka. ²²¿Antari gara pikañoi giro maika? Pineaigavetakaty pikañovintsaigakerora maika ariometyo pisekataigakempame pivankoegiku. Antari pikañoi gakerora maika kañomataka ontinirikatyo pikisavakagaigaka pashirikovakagaigakeri kogakovageigacharira. Maika ¿tyara nonkantaigempi? ¿Ario noshineventaigakempi? Garaty noshineventaigimpi pikañoi gakerora maika.

Tyara onkantakenkani osekatakenkanira isuretaketakenkanira Atinkami

(Mt. 26.26-29; Mr. 14.22-25; Jr. 22.14-20)

²³Nogotagaigavetakempitari karanki yogotagaigakairira Atinkami nokanti: Iroro ochapinitanakera iragakagantakenkanira Atinkami irogakenkanira inoshikakero pan yapagotakero ²⁴iniakeri Tasorintsi ikanti: “Apa, noshineventa-kempi pipakenarora oka pan.” Impo ikotagakero ipaigakerira irogamereegi ikantaigiri: “Okari oka pan kañomataka ontinirikatyo novatsa, nonkamaventaiga-

kempitari kameti pavisakoigaeniri viroegi. Nero gaigemparo. Omirinka pinkañoigempara maika pisekataigempara pisuretakoigaenara naro.” ²⁵Impo yagataiganakera isekataigakara irorokya inoshikakotake vino ikanti: “Okari oka vino kañomataka ontinirikatyo noriraa ovoatanakera nonkamaventaigakerira maganiro matsigenkaegi. Pairani Tasorintsi ontitari ikantaigavetakari yashikiiganakempirira intsatagaigakerora itsirinkakotanakerira Moiseshi ganiri ikisashii-gari.” ^mMaikari maika ariokya ikantake irogavisaakotantaigakempirira noriraa maganiro kematsaigakenanerira. Omirinka pinkañoigempara maika poviikaigempara pisuretakoigaenara naro.” ²⁶Nerotyo omirinka pinkañoigempara maika pisekataigempara ontiri poviikaigempara onti pisurettagavakagaigempa ikamaventaigakaira Kirishito. Kantakani pinkañoigakempa maika kigonkero iripokaatera irirori.

²⁷Irrotari maika nonkantantaigakempirira tyanirika sekatanichane kogapage ontirika iroviikashitakemparo kogapage garira iriro isuretakota Atinkami ikamaventaigakaira, tsikyatyatyo inkañotagantakempa ikiiro, isamatsanatakerotari ivatsa ontiri aikiro iriraa Atinkami. Ogari pan ontitari okantakotake ivatsa, irorokya vino onti okantakotake iriraa. ²⁸Nerotyo tyanirika kogankitsine irogakemparora pan ontiri iroviikakemparora vino isuretakotaempirira Atinkami ikamaventaigakaira oketyotyoty ineanotakempa ariorika inegintetasanotaka kameti irogakemparora, aikiro iroviikakemparora. ²⁹Antari ontirika irogashitakemparo kogapage, aikiro iroviikashitakemparo kogapage gara isuretaro oga pan onti okantakotake ivatsa Atinkami, irorokya vino onti

okantakotake iriraa, inkisashivageta-kemparityo Tasorintsi.

³⁰Irorotari kantankicha pikonogagaran-taigaka pimantsigaiganake, pashinikya tera ishintiigae pashinikya onti ikamaigana-ke. ³¹Antari oketyorika aneasurentaiga-kempa negintekya anaigake ario tatatyo onkenantakempa inkisashiigakaera Tasorintsi inkañoigakaera maika.

³²Kantankicha antari ikañoigakaira maika onti kameti ankematsatasanoigakeriniri ganiri itentagantaigairi terira inkema-tsaige inkisashiigakemparira impogini.

³³Irorotari maika nonkantantaigakempirira antari pampatoitaigempara piseketaigakempara pisuretaoigakemparira Atinkami ikamaventaigakaira pogiaavaka-gaigakempara pintentavakagaigakempara.

³⁴Tyanirika tasegankitsi isekatanakempa-tyo ivankoku ganiri ikatimanatiro anta papatoitaigara ganiri ikisaviigiri Tasorintsi. Ogari otovaire pikogakotagantageiga-kenarira impogini nonkamantaigakempi nompokakiterika noneaigakitempira.

Tyara ikanta Isure Tasorintsi yagaveakagaigajaira

12 ¹Maika, napigematsaegine, nokogake nonkamantaigakem-pira tyara ikanta Isure Tasorintsi yagaveakagaigajaira paniropage. Nokogake pogotasanoigakera ganiri pikomuigaro. ²Viroegi pogoigaketari tekyara pinkematsaige onti yamatavi-naigakempi kamagarini pishineventa-geigakemparira ipegagetaganirira tasorintsi kogapage terira iriniimaige. ³Irorotari nokogantakarira pogoigakera tera iriro niakagerine Isure Tasorintsi tyanirika kantankitsine: “Inkante Jeso.” Aikiro gara tyani gaveatsi inkantakera tsikyata: “Jeso inti Notinkami”, garira iriro niakagiri Isure Tasorintsi.

⁴Akantatigaigavetakatyo agaveaigakera paniropage kantankicha ikiirotyo

gaveakagaigakai Isure Tasorintsi. ⁵Aikiro akantatigaigavetakatyo antavageigira paniropage kantankicha panirotyo antavageigini Atinkami. ⁶Teraty ario ankañoitagasanoigavetemparo tyarika ikantaigiro pashini yantavageiginirira, kantankicha irirottyo gaveakagaigakai Tasorintsi paniropage. ⁷Yagaveakagaiga-kaitari Isure Tasorintsi paniropage kameti amutakovakagaigakempara ariompaniri ankematsatasanoiganakeriri Atinkami. ⁸Paniro yagaveakagakeri inkenkitsatako-takerora yogotagakeririra Tasorintsi. Pashini onti yagaveakagakeri inkemava-kerora okenkitsatakotaganira Iriniane Tasorintsi ovashi irogotagantavagetanake irirori. ⁹Pashinikya onti yagaveakagakeri irogotasanotakera paio yagaveavageti Tasorintsi. Impo pashini onti yagaveaka-gakeri irovegaigakerira mantsigaiganki-tsirira. ¹⁰Ikonogagaran-taigaka pashini onti yagaveakagaigakeri irovetsikaiga-kera terira oneimagetenkani. Pashini onti yagaveakagakeri inkamantantakerora ikantakeririra Tasorintsi. Pashinikya onti yagaveakagakeri irogotavakerira kenkitsatsirira irirorika gaveakagakeri Isure Tasorintsi intirika gaveakagakeri kamagarinipage. Aïño pashini onti yagaveakagakeri iriniantakemparora pashinipage niagantsi terira oniantuma-tenkani, impo pashinikya yagaveakagake irogotakera irogishonkavakerora kameti inkemaigakeniri maganiro irogoigakera tyarika ikanti. ¹¹Pine maika agaveaigave-takatyo posantepage kantankicha ikiirotyo Isure Tasorintsi gaveakagaiga-kai, panirotari inakera irirori. Yagaveaka-gaigakai paniropage avetsikaigakera tatarika inintake irirori avetsikaigakera.

Maganiro aroegi kematsaigatsirira kañomataka panironirikatyo anaigake

¹²Pine matsigenka paniro inavetaka, kantankicha otimagetaketyo irako,

ivonkiti, igempita, magatiro. Ariotyo akañoigaka maganiro aroegi kematsaigiririra Kirishito atovaigavetakaty, aikiro akantatigageigavetakaty kantankicha panirotari inake akematsaigakerira kañomataka panironirikaty anaigake. ¹³Ario okañotaka aikiro panirotari ikantakara Isure Tasorintsi timasurentaigakairira ovashi atentavakagaigaka kañomatika panironirikaty anaigake. Akonogagarantaigavetakaty antiengi jorioegi aikiro guriegoegi. Ario okañotaka aikiro akonogagarantaigavetakaty onti yashintaitakai, aikiro akonogagarantagagaka onti atimashiigakaro kogapage, kantankicha antari itimasurentaigakaira Isure Tasorintsi ariotyo akañovakagaigaka.

¹⁴Pine matsigenka tera ario intagati ontime yogantarira kavako. Otimaketyo aikiro yairikantarira ontiri yanuitantarira ontiri aikiro ikemantarira. ¹⁵Antari onkisempara ivonkiti onkantera: “Kañotari maika tera ario nonkañotemparo irako maika garaty yashintaana”, ñmatsi ario irapakuanakero ganige yashintaaro? Garaty, ario choeni onkantake maika ovashi ganige yashintaaro. ¹⁶Ontirika kisankichane igempita onkantakera: “Kañotari maika tera ario nonkañotemparo iroki maika garaty yashintaana”, ñmatsi ario irapakuanakero ganige yashintaaro? Garaty, ario choeni onkantake maika ovashi ganige yashintaaro. ¹⁷Antari intagatira timankitsine iroki, ñario tataty inkemantakempa?, mameritari igempita. Ario okañotaka aikiro intagatira timankitsine igempita, ñario tataty inkemaenka tantakempa?, mameritari igirimashi. ¹⁸Kantankicha Tasorintsi ineginteigakai yovetsikaigakaira, irorotari otimantagetakarira akemantaigarira ontiri aneantaigarira ontiri aikiro anuitantaigarira, magatiro. Aikiro yogagetakairo tyarika inintake irogakaerora. ¹⁹Antari intagatira

timankitsine aneantaigarira ñario tyara ankantaigakempara? ²⁰Kantankicha tera ario onkañotempa maika, ontityo otimagetake aikiro avonkitiegi, agempitaegi, akoegi, magatiro. Okañogevetakaty maika otimagetakera magatiro kantankicha panirotyo anaigake.

²¹Ogari aneantaigarira gara okantumatiro akoegi: “Tera nonkogakotempl.” Ario okañotaka agitoegi irorori gara okantumatiro avonkitiegi: “Tera nonkogakotempl.” ²²Pairotari okogakotunkani tyatirika oneavetunkani kañomataka tenirika onkogakotenkani. ²³Ario okañogetaka aikiro terira ankogaige oneagetakenkanira, pairotyo okogakogotunkani, aikiro pairotyo anegintetasano geigakero neroty agagutantaigarira ganiri oneagetagani, apashiventagaigakarotari. ²⁴Kantankicha ogari terira ampashiventagaigemparo teraty ario ankañoigero maika. Ario ikañotagaigakai Tasorintsi aroegi kematsaigiririra itentagavakagaigakai kameti inegintetasanoigakenkaniniri yogaegi ineaigavetunkanirira kañomataka tenirikatyo inkogakotasanotenkani ²⁵kameti ganiri akisavakagaiga ashirikovakagaiganakempara, onti asuretakovakagaigakempa ankavintaavakagaigakempara. ²⁶Ariorika yatsipereake paniro maganirotyo atsipereaiigake. Antari ontirika ishineventunkani pashini maganirotyo aroegi atentagaigakari ashinevageigakara.

²⁷Neroty viroegi maika pikematsaigakerira Kirishito pitentagavakagaigaka kañomataka panironirikaty pinaigake. ²⁸Yogari Tasorintsi ikantatigakagaigakeri paniropage kematsaigiririra irantavageigakenerira. Iketyo yogiivaiigake iritigankaneegi Kirishito inkenkitsatakoigakerira. Impo irirokya imaigake kamantantaigakerorira ikantaigakeririra. Impo imaigakeri aikiro gotagantaigirorira Iriniane Tasorintsi. Impo ikonogaga-

rantaigaka pashini ikogakagaigakeri irovetsikaigakera terira oneimagentenkani. Pashini onti ikogakagaigakeri irovegaigakerira mantsigaigankitsirira, pashinikya onti inkavintaantavageigakera, pashini onti inkantaigakerira irapigematsaegine tatarika irantaigake, impo pashini onti iriniantaigakemparora pashinipage niagantsi terira oniantumatenkani. ²⁹¿Matsi maganiro ipegaigaka iritigankaneegi Kirishito? ¿Matsi maganiro ikamantantaigakero ikantaigakeririra Tasorintsi? ¿Matsi maganiro ipegaigaka gotagantaigirorira Iriniane Tasorintsi? Ario okañotaka aikiro ¿matsi maganiro yagaveaigake yovetsikaigakera terira oneimagentenkani? ³⁰¿Matsi maganiro yagaveaigake irovegaigaerira mantsigaigankitsirira? ¿Matsi maganiro iniantaigaro pashinipage niagantsi terira oniantumatenkani? Ario okañotaka aikiro ¿matsi maganiro yagaveaigake irogishonkaigakerora kameti inkemaigakera maganiro irogoigakeniri tyarika ikanti niantakarorira? Teratyó.

³¹Kantankicha pimpirininventasanoigakerotyó magatiro ikogagetakerira Tasorintsi pinkogasanoigakera iragaveakagaigakempira povetsikaigakera pairorira avisake oshintsitagaigakerira papigematsaegine. Kantankicha aityokya pashini nokogakerira nogotagaigakempira maika pairotyó avisake okametitasanotakera.

Tyara ikanta tasanotantacharira

13 ¹Noniagevetakempatyó pashinipage niagantsi ontirika iriniane isaankariite Tasorintsi kantankicha garika notasanotanta ontityó noniavagetake kogapage, kañomatata asuromenta opasataganira okantanake tseneron tseneron tseneron tera tyara onkantumate. ²Aikiro ontirika nagaveagevetakempa nonkamantantakerora ikantakena-

rira Tasorintsi kantankicha garika notasanotanta tyampa nonkantakero. Ario onkañotake aikiro ariorika nogogevetakemparo posantepage terira ogogevetenkani, ontirika nontotenkagevetakemparo nogotakera magatiro kantankicha garika notasanotanta ontityó nogotashitakemparo kogapage. Aikiro ontirika nogovetakempa yagaveake Tasorintsi iragaveakagakenara nogagetakerora otishi kantankicha garika notasanotanta ontityó nogotashitakemparo kogapage tyampa nonkantakero. ³Ario onkañotake aikiro ontirika nompimantagevetakemparo magatiro nashintagetarira nompigakerira kogakoigankicharira ontirika nompimantavetakempa intagaigakenara kisaviigakenarorira nokenkitsatakoterira Jesokirishito, kantankicha garika notasanotanta ¿matsi ario irishineventavitakenaro Tasorintsi?

⁴Yogari tasanotantacharira yatsipereakovageta, aikiro paio ikavintaantavageti. Tera inkisaviteri pashini ineakerira yavisakerira, tera iraventakotumatempa, aikiro tera iitempa. ⁵Onti kametikya inavageti tera paniro isuretakotempa irirori. Tera inkisempa, aikiro tera inkantakani isuretemparo tyarika ikantakeri pashini, onti imagisantairo. ⁶Ineakerika ovetsikunkanira terira onkametite teratyó ogishineimateri ontityó okenkisureakagakari. Kantankicha ontirika ovetsikunkani kametiripage ario pinkante ishinevageta-katyó kara. ⁷Tyarika inkantavetakempa itovaire garatyó iperatumatari, ontityó atanatsi intasanotanakempari. Ariorika inkemakotakeri inishinatunkanira garatyó imatanaka irirori onti inkantake: “Impa terakari ario inkañotero maika.”

⁸Arioniroro ankañoigakempari maika ankantakanira antasanotantavageigakempa. Kantankicha ogari okamantantaganira ikantakerira Tasorintsi impogini ompeganakempa. Ario onkañotakempa

aikiro niagantsipage terira oniantumatenkani ganigetyo oniantaagani, aikiro ganige okogakotaagani iragaveakagaiga-kaera Tasorintsi agovageigakera.

⁹Maikari maika tera agotasanoige, aikiro tera agotasanoige ankamantantasanoigerrora Iriniane Tasorintsi. ¹⁰Kantankicha antari impogini inkantatigakagasanoigakaera Tasorintsi ganigetyo akañoigaa maika tesakonara agoige. ¹¹Antari notyomiakyaniira nokañotasanoigaari maganiro ananekiegi iniavageigira, aikiro isureigara. Kantankicha antari nantaritanakera tenige nonkañotaempa maika. ¹²Ario okañotaka maika tesakona agotasanoige tyara ikanta Tasorintsi kañomatakatyto ontinirikatyto aneatantagakaro nearontsi tesakonarira onkoneate, kantankicha impoginityo aneasanoigakeri ovashi agotasanoigake tyara ikanta irirori kañotaka ineasanoigajaira aroegi yogotasanoigajaira.

¹³Kantanityo ankematsatasanoigakerira Tasorintsi, aikiro agotasanoigakera intsatagasanotakero magatiro ikantakerira, ontiri aikiro kantanityo antasano-tantavageigakempira, kantankicha pairo avisake okametitakera antasanotantavageigakempira.

Tyara inkantaigakempa niantaigarorira niagantsipage

14 ¹Kogasanoige pintasanotantavageigakempira, aikiro kogasanoige iragaveakagaigakempira Isure Tasorintsi tatarika ikogake iragaveakagaigakempira, irorosanotyto pinkogasanoigake iragaveakagaigakempira pinkamantantaigakerora ikantaigakempirira Tasorintsi. ²Yogari niantarorira niagantsi terira oniantumatenkani inti iniake Tasorintsi, tera iriro iriniaige itovaireegi, teranika inkemaigeri. Inti niakagakeri Isure Tasorintsi, kantankicha onti iniakotake terira ogotumaten-

kani. ³Kantankicha yogari kamantanta-getirorira ikantakeririra Tasorintsi intityo iniaigi irapigematsaegine ishintsitagaigakerira ariompaniri inkematsatasanoiganakeri ontiri aikiro irogishineai-gakerira. ⁴Yogari niantarorira niagantsi terira oniantumatenkani ikiro shintsitagaacha inkematsatasananakera, kantankicha yogari kamantantagetirorira ikantakeririra Tasorintsi intityo ishintsitagaigake maganiro irapigematsaegine ariompaniri inkematsatasanoiganakeri. ⁵Nokogavetaka iragaveakagaigakempira Isure Tasorintsi maganiro viroegi piniantaigakemparora niagantsipage terira oniantumatenkani, kantankicha pairotyto avisake nokogasanotakera iragaveakagaigakempira pinkamantantaigakerora ikantaigakempirira Tasorintsi, pairotari avisake okametitakera pinkamantantaigakera avisakero piniantaigakemparora niagantsi terira oniantumatenkani garira itimi gishonkakeronerira pinkantaigakerira kameti pishintsitagaigakerira papigematsaegine atanatsira inkematsatasanoiganake.

⁶Pine naro noatera noneaigempira irororika noniantaigakempi niagantsipage terira oniantumatenkani imatsi iroto noshintsitagaigakempi? Kantankicha antari ontirika nogotagaigakempi pinianeegiku yogotagakenarira Tasorintsi ontirika nonkamantaigakempi ikantakenarira Tasorintsi nogotagaigakempira ario pinkante noshintsitagaigakempiniroro. ⁷Kañotari sonkarintsi tera ontimavetempa osure kantankicha opoimatityo. Antari onsonkataganira garika onegintetaganigani garatyto ogotaganigani tyarika okanti. Ario okañotaka gitara irorori okitarataganira. ⁸Ario okañotaka aikiro iaigira yomanatavakagaigara garika onegintetaganigani otivotaganira tivorintsi garatyto ogotaganigani tatoita otivotashitunkani, garatyto tyani vetsikacha iriatakera

iromanatakempara. ⁹Ario pikañoigaka aikiro viroegi piniantaigemparora niagantsi terira oniantumatenkani ¿ario tyanityo kemaigakempine? Kañomataka ontinirika piniagitevageigake kogapage.

¹⁰Otimagevetatyos antepage niagantsi kantankicha okemaganityo patiropage.

¹¹Kantankicha ariorika iriniakena pashini terira nonkemero iriniane irogotake tera naro itovaire, ario nonkañotake naro nogotake tera iriro notovaire.

¹²Nerotyo nonkantantaigakempirira maika irorotari pikogavintsagakera iragaveakagaigakempira Isure Tasorintsi posantepage irorosanotyos pinkogasanoi-gake oga shintsitagaigakerineririra papigematsaegine atanatsira inkematsasanoiganake. ¹³Tyanirika niantakemparone niagantsi terira oniantumatenkani iriniakerityo Tasorintsi inkantakerira iragaveakagakerira irogishonkakerora ikantakerira.

¹⁴Pine naro ariorika noniakeri Tasorintsi niagantsiku terira oniantumatenkani onti noniake nosureku, kantankicha gara nogoti tyara nokanti. ¹⁵Iroroventi ¿tyarika nonkantakempa? Noniakerityo Tasorintsi nosureku, kantankicha nogotavakerora aikiro nokantakerira. Nomatikaventakerityo nosureku, kantankicha aikiro nonkemavakerora nomatikakerira. ¹⁶Pine viro ariorika pinkogake piniakerira Tasorintsi pinkantakerira pishineventakari kantankicha irororika piniantakempari niagantsi terira oniantumatenkani ario tyara inkantakempara inkemavakempira papigematsatene terira inkemero oga piniantakarira kameti intentakempira iriniakerira irirori aikiro Tasorintsi.

¹⁷Pinkañotakerorika maika onkametigeve-takempatyos pinkantakeririra Tasorintsi kantankicha garika ikemaigimpi papigematsaegine garatyos oshintsitagaigiri atanatsira inkematsasanoiganake.

¹⁸Narori noshineventakarityo Tasorintsi noneakera yagaveakagakenara Isure

noniantakarora niagantsipage terira oniantumatenkani navisavageigakempityo viroegi maganiro. ¹⁹Kantankicha antari notentaigarira napigematsaegine napatoitaigara noneake paio avisake okametitakera noniakera maani nokemakerira naro kameti nogotagaigakerira napigematsaegine avisakero noniavagetakera tovaiti niagantsiku terira oniantumatenkani gatanika ikemaigana.

²⁰Maika, napigematsaegine, nonkantagaigakempi gara pisureiga kañoigaka isureigara ananekiegi, onti pinkañoigakempari maganiro antariniegi goigatsirira isuretasanoigara. Intagati pinkañoigakempari ananekiegi tekyara isureigemparo irovetsikaigakerora terira onkametite. ²¹Okantaketari Itsirinkakagantakerira Tasorintsi okanti:

“Ikantake Atinkami: ‘Nontigankaigakeri pashinipagekunirira niantaigarorira pashinipage niagantsi iriniaigakerira yogaegi nokogakaigakerira nashintaigakemparira, kantankicha garatyos ikematsaigi.’”

²²Nerotyo agotantaigakarira yagaveakagaigakai Isure Tasorintsi aniantaigakemparora pashinipage niagantsi terira oniantumatenkani kameti irogoigakeniri terira inkematsaige inkisashiigakemparira Tasorintsi, kantankicha antari yagaveakagaigakaira ankamantantaigakerora ikantaigakairira Tasorintsi onti kameti oshintsitagaigakerira kematsaigatsirira atanatsira inkematsasanoiganake.

²³Antari pampatoitaigempara maganiro intagatirika piniantaigakempa niagantsipage terira oniantumatenkani impo inkiapaake pashini terira inkematsate intirika tekyarira irogote tyara pikantagaka pikañoigakara maika, ¿matsi gara ikomuigimpi ineiri ariori pipigaigake?

²⁴Kantankicha ontirika pinkamantantaigakero ikantaigakempirira Tasorintsi, impo

inkiapaake pashini terira inkematsate intirika tekyarira irogote inkemaigapaa-kempi ovashi ineakempa ikiiro inti kañovagetacharira. ²⁵Aikiro irogotake onti ogotunkani magatiro isuregetarira ovashi intigeroaventanakempari Tasorintsi inkantakera arisanoniroro itentaigakempi Tasorintsisanorira.

**Tyara inkantaigakempara
patoitaigankicharira
ineginteigakerora magatiro**

²⁶Irorotari maika, napigematsaegine, nonkantantaigakempirira antari pampatoitaigempara ontityo pampatoventaigakempa pishintsitagavakagaigakempara. Pinkonogagarantaigakempa pinkantaigakeri maganiro: “Tsame amatikaventaigakerira Tasorintsi.” Impo pashini onti irogotagantavagetake. Pashinikya onti inkenkitsatakotakero yogotagakeririra Tasorintsi. Pashini onti iriniantakemparo niagantsi terira oniantumatenkani, impo pashinikya gishonkakerone ikantakerira. ²⁷Antari piniantaigemparora niagantsipage terira oniantumatenkani intaganityo niankitsine piteni ontirika mavani, kantankicha paniropagekya niavankitsine, aikiro intimake paniro gishonkakeronerira. ²⁸Antari garika itimi gishonkakeronerira iroroventi garatyo piniantaigaro papatoitaigakara, ontityo pogaigakero pampuntai-gakempara paniro, ario pinkante kametiketyo piniantaigakemparora inkemaigakempira Tasorintsi.

²⁹Ario onkañotake aikiro pinkamantantaigakera intaganityo niankitsine piteni ontirika mavani impo yogari pitovaireegi inkantaigake irirorika niakagaigakempi Isure Tasorintsi ontirika tera. ³⁰Kantankicha aiñorika yaratinkake paniro ikamantantakera impo año pashini pirinitankitsirira iniasurentakeri Tasorintsi irirori inkamantantakera, yogari iketyorira

niankitsi okyakonatyo irapakuanae kameti irirokyaniri niankitsine irapitene. ³¹Arioniroro pinkañoigakempa maika paniropagekya piniaigavake ompote pagaveaigakera maganiro pinkamantantaigakerora ikantaigakempirira Tasorintsi kameti pogotagaigakeriniri maganiro papigematsaegine, aikiro pishintsitagai-gakerira. ³²Yogaegiri yagaveakagaigakerira Isure Tasorintsi inkamantantaigakerora ikantaigakeririra Tasorintsi negintekya inkamantantavageigake gara ikogaigi panirora iriniaigake iriroegi. ³³⁻³⁴Teranika inkoge Tasorintsi ankantavakagaigempara onti ikogake negintekyara agaigakero magatiro.

Antari papatoitaigara ogari tsinaneeegi onti onkemisantavageigake, gara oniashivageigaro kogapage onti onkematsantavageigake, ariotari okantakeri itsirinkakotanakerira Moiseshi, aikiro ariotari ikañoigirori kematsaigatsirira tyarikara yapatoitaiga. ³⁵Antari onkogaigakerika ogoigakera tatarika oita onkogakotagantaigakerityo ojime ovankoku, teranika onkametite onniavageigera tsinaneeegi yapatoitaigakara maganiro.

³⁶¿Antari gara pikañoiga maika tera negintekya pogaigeri papigematsaegine papatoitaigara? ¿Matsi viketyo tsitiventagaigakero pogoigakerora Iriniane Tasorintsi? ¿Matsi intagani viroegi kemaigakero? ³⁷Tyanirika neankicha yagaveakagakerira Isure Tasorintsi inkamantantakera ikantakeririra Tasorintsi, ontirika ineaka yagaveakagakerira tatarika oita pashini, irogotaketyo inti kantakena Atinkami nonkañotakerora maika nonkantaigakempira. ³⁸Antari garika ikogi inkañotakerora maika garatyo ikemisantagani, ontityo inkantakenkani tera iriro gaveakagerine Isure Tasorintsi. ³⁹Irorotari maika, napigematsaegine, nonkantantaigakempirira pinkogasanoigakera iragaveaka-

gaigakempira Isure Tasorintsi pinkamantantaigakera ikantaigakempirira Tasorintsi, aikiro gara pikantaviigiri pashini iriniantaigakempirora niagantsipage terira oniantumatenkani. ⁴⁰Onti negintekya pogageigakero magatiro.

**Pavoro ikamantakotakerira
Kirishito yanianaira**

15 ¹Maika, napigematsaegine, nokogake nosuretagaigaempirora nokenkitsatimoigakempirira nokamantagakempira tyara ikanta Tasorintsi yogavisaakotantira ovashi pikematsaigake, maika kantanikani pikematsaigakera. ²Irorotari yogavisaakotantaigakempirira Tasorintsi aiñokyarika pikematsatanogigiri, aikiro terika oga pinkematsatamampegaigempa kogapage.

³Okyara oketyo nogotagaigakempiyogotagitakenarira naro nokantaigakempira ikamaventaigakai Kirishito irisaankaerora akañovageigara, ariotari okantakeri Itsirinkakagantakerira Tasorintsi. ⁴Ikitavetunkani impo omavatanaka kutagiteri yanianai, ariotari okantakeri aikiro Itsirinkakagantakerira Tasorintsi. ⁵Impogini ikoneatimotakeri Perero impo imagakeri aikiro iritigankaneegi. ⁶Impo ikoneatimoigakeri aikiro tovaini apigematsaegine yapatoitaigakara itovaigavageigityo kara yavisaiganakero 500. Maika aiñokya itimaigi tovaini neaigakeririra, kantankicha ikonogagarantaigaka kamaigake. ⁷Ikoneatimotakeri aikiro Jakovo impo imagakeri maganirio iritigankaneegi. ⁸Impogini ikoneatimomatanaty naro, kantankicha tera ario nonkañoiigempari ⁹iketyorira ipegagake iritigankaneegi, ontityo yavisaigakena iriroegi. Gamero-rokari ipegakagana iritigankane, pairotari nokisashivageigavetakari kematsaigatsirira natsipereakagavageigakarira. ¹⁰Kantankicha ikavintsaavagta-

kena Tasorintsi ipegakagantakenarira iritigankane ovashi navisaigakeri maganirio iritigankaneegi nantavagetakenerira, kantankicha teratyo tsikyata nagavee naro nantavagetakenerira, intityo gaveakagakena Tasorintsi kavintsaakenarira. ¹¹Kantankicha maika gara iroro pisureiga tyani paio yavisake, narorika intiegirika pashini iritigankaneegi, maganirotari nokenkitsatakoigakeri Tasorintsi nokamantaigakempira tyara ikanta yogavisaakotantira, nerotyo pikematsatantaigakarira.

**Iraniaiganaera maganirio
kematsaigatsirira**

¹²Ikenkitsatakotunkanitari Kirishito yanianaira ikamavetakara çtyara okantakara pikonogagarantaigaka viroegi pikantaigakera gara anianaagani? ¹³Antari ariora onkañotakempa maika iroroventi terorokari iraniana Kirishito, ¹⁴ontirorokari nokenkitsavageigake kogapage. Ario pikañoiigaka viroegi ontirorokari pikematsaigake kogapage. ¹⁵Aikiro naroege ontirorokari notsoeven-taigakeri Tasorintsi nokamantakoigakerira nokantaigakera yoganiairi Kirishito, kantankicha terorokari iroganiaeri, gatanika anianaagani. ¹⁶Pikantaigaketari gara anianaagani iroroventi ariorokari ikañotaka Kirishito irirori terorokari iraniana. ¹⁷Antari ariomera onkañotakempa maika ontirorokari pikematsaigake kogapage tekyarorokari irogavisakoigempi Tasorintsi aiñokyarorokari ikisaviigimpro pikañovageigakara. ¹⁸Ario ikañoiigaka aikiro kamaigankitsirira kematsaigakeririra Kirishito iriaigakerorokari morekariku. ¹⁹Antari gamera arisano aniaiganai impogini iroroventi ontirorokari akematsaigavetakari Kirishito kogapage, intagatirorokari akantaigavetaka maika iroganiaigajaera, kantankicha impogini aneaigake paio

inkitareaiganaera kamaigankitsirira? Antari intinajaiganaera ¿tyarika inkantaigakempa? ¿Ario ontimae ivatsa?” ³⁶Tyanirika kantankitsine maika teratyo irogote. Ogotunkanitari garira opankitagani okitsoki turigo garatyo oshivoki. ³⁷Antari opankitagani teranika iroro ompankitenkani oshina, intagatityo opankitagani okitsoki irororika turigo ontirika tatapagerika oita pashini timatsirira okitsoki. ³⁸Impogini tsikyata ishivokakagakero Tasorintsi irirori ikañotagasanotaaro tyarika ikañotagakaro okyasanokyara yovetsika-kerora. Pine tatarika oita opankitagani iroroty shivokaatsi, kantankicha onti okantatigagetaka patiropage, teratyo ario onkañovakagempa magatiro. ³⁹Ario ikañotaka aikiro maganiro niagetatsirira tera ario inkañovakagempa onti ikantatigagetaka. Pine matsigenka tera ario inkañotempari kamarigetatsirira. Ario ikañogetaka aikiro aragetatsirira tera ario inkañogetempari timagetatsirira oaaku. Maganirotyo ikantatigagetaka. ⁴⁰Ario okañotaka aikiro aña timaigatsirira enoku inkiteku ontiri aikiro aka kipatsiku, kantankicha tera ario inkañovakagaigempa ikametiigakera, ikantatigaigakatari timaigatsirira enoku inkiteku, ario ikañoigaka aikiro timaigatsirira kipatsiku ikantatigaigaka ikametiigakera. ⁴¹Pine poreatsiri iporeira tera ario inkañotempari ikutase-tira kashiri, aikiro tera ario inkañotempari ikutaponkakitira impokiro, kantankicha ikonogagarantaka paio yavisake ikutaponkakitakera, pashini tesakona.

⁴²Ario okañovetakaro aikiro iraniaiganaera kamageigankitsirira. Antari ikitatunkanira kamankitsirira yovesegavetanakaty kantankicha impogini iranianaegaratyo ineimatairo igamane. ⁴³Antari

ikitatunkanira pairatamatake ivatsa tenige oshineventaenkani, kantankicha antari impogini intinaanaera garatyokañotaa maika ontityo onkamentivagetake. Ario okañotaka aikiro ikitatunkanira pairatamatake tenigetaty tatakona iragaveimagetae, kamasanotaketari, kantankicha antari iranianaera ario pinkante iragaveavagetaketyo. ⁴⁴Okyara onti okitatunkani ivatsa gametankicharira otimakera aka kipatsiku, kantankicha impogini onti tinaanankichane pashini ivatsa okyarira gametankichanerira otimakera anta enoku. Aityotari gametankicharira otimakera aka kipatsiku, ariotyokañotaka aikiro aityo gametankichanerira otimakera enoku.

⁴⁵Ariotari okantakeri Itsirinkakaganta-kerira Tasorintsi okanti: “Yogari Aran iketyorira yovamparoatunkani onti yoganiinkani”, kantankicha yogari Aran impogitanankitsirira onti yoganiaigakai ganiri aneimaigairo agamane, onti yoganiaantaigakai Isure. ⁴⁶Kantankicha oketyo timankitsi avatsaegi gametankicharira otimakera aka kipatsiku. Ogari gametankichanerira otimakera enoku iroroty impogitankitsine. ⁴⁷Yogari iketyorira yovamparoatunkani onti yovetsikantunkani kipatsi,ⁿ aikiro onti itimake aka kipatsiku. Yogari impogitankitsirira onti iponiaka enoku, irirotari Atinkami. ⁴⁸Imirinka matsigenka ario ikañoigakari Aran yovetsikantunkanira kipatsi, irirotari yashikiigakeri okyara. Ario inkañoigake aikiro maganiro kematsaigakerineririra poniankicharira enoku, ariotyokañoigakempari irirori. ⁴⁹Ariotari akañoigakariri yoga yovetsikantunkanirira kipatsi ariotyokañoigakempari aikiro yoga poniankicharira enoku.

⁵⁰Maika, napigematsaegine, nokogake nonkamantaigakempira antari

ikañoitara aka ivatsaitira aikiro irirajaitira garatyo atumaigi itimira Tasorintsi, ogari avatsaegi teranika onkusote nerotyo gara agaveaigi atantaigakemparora iriroku ankantakanira antimaigake.

⁵¹Aikiro maika nokogake pogoigakera terira ogovetenkani pairani. Garatyo akamaigi maganiro, kantankicha maganirotyo ankantatigaiganakempa, impaigakaetari Tasorintsi pashini avatsaegi okyaria. ⁵²Antari panikyara ontsonkagetanakempa magatiro, ontivotakenkani karakutasanotankitsinerira tivorintsi. Irorotyo ontivotakenkanira ogaty ankenaigake ankantatigaigapagenityo anaiganake garatyo aneakoigavaka. Ario inkañoigakempa apigematsaegine kamaigankitsirira ogaty inkenaigake iraniaiganake ovashi garatyo ineimaigairo igamane.

⁵³Ogari avatsaegi terira onkusote gatanika iroro nianaatsi, pashinityo pugakerone onkantakanirira onkusotake ovashi gara aneimaigairo agamane.

⁵⁴Antari onkañogetakempara maika ontsataganakempa Itsirinkakagantakerira Tasorintsi kantatsirira: “Garatyo oneimataagani okamaaganira.”

⁵⁵“Maika garatyo asuretumaigaaro agamane,

aikiro garatyo apinkumaigairo, gatanika agaveimaigajai.”

⁵⁶Antari gamera akañovageiga gametyo aneai giro agamane. Ario okañotaka aikiro gamera ikamantakagantaigajai Tasorintsi magatiro ikogage-takerira avetsikaigakera gametyo akañovageitasanoiga, kantankicha maika ikamantakagantaigakaitari ovashi iroro okenantakarira akañovageitasanoiganakara, teranika antsatagaigeronika.

⁵⁷Kantankicha maika matsi ariokonaty ikavintsajaigakai Tasorintsi ikamaventaigakaira Atinkami Jesokirishito impo yanianai, irorotari maika yagaveakagan-

tavageigakairira Tasorintsi ashintsitashiigakerora kañovageitangantsi ganiri akañovageigaa, akematsaigakeritari Atinkami Jesokirishito. ⁵⁸Irorotari maika, napigematsaegine notasanoigairira, nonkantantaigakempirira pinkantakanira pinkematsatasanoigakeri Atinkami pishintsitashivageigakerira kogaigavetankichanerira irapakuakagai-gakempira pikematsaigakerira. Aikiro pinkantakanira pantavageitangantsiigakeri, gara piperaiga, pogoigaketari gara ario pantavageiginiri kogapage.

Irapatoigakenerira koriki impakagantaigakerira irapigematsaegine

16 ¹Maikari maika irorokya nonkamantasanoigakempi tyara pinkantaigakempa pampatoigakenerira koriki pimpakagantaigakerira apigematsaegine kogakovageigankicharira. Onti nokogake pinkañotagaigakemparora nokantaigakeririra apigematsaegine Garashiakunirira. ²Omirinka tominko paniropage viroegi pashirikotagarantaigakera pigorikiegite pagantaigakarorira tatarika oita pantageigakerira, kantankicha paniropage intagati irashirikotagaran-take akarika iragaveake. Yogari pairorira yagake irashirikotagaran-take tovaini. Yogari maanirira yagake irashirikotagaran-taketyo maani. Impo pogaigakeri anta pivankoeigiku irashirikoni irinake kameti impo nompokakera ganiri vikyaenka sureiganankicha pinkantaigakera maika tyarika nagakeri nompakerira, matakatari pashirikoigake. ³Impogini nompokakerika ario nontigankaigakeri yogaegi pinkogai-gakerira iriaigakera Jerosarenku. Nontsirinkavake sankevanti nompagavakerira kameti iramaiganakeneriniri papatoigakeneririra papigematsaegine timaigatsirira anta. ⁴Impogini ariorika noneake kametitake noatakera naro aikiro, iroroventi narotyo irogiagianake.

**Pavoro ikarataganairora
ikamantageiganairira**

⁵Antari nompokakera onti noatapanute Maseroniaku impo nogonkevetakempa kara. ⁶Ariorika samani nontimimoiganakempi ontirika nogavisanakero katsinkagiteri kigonkero avisanaera, impogini pinkavintsajaigavaena noatanaera pogavokiigavaenara. ⁷Teranika nonkoge tainara noneaigapanutempi, onti nokogake samanira nontimimoiganakempi, irirorika nintankitsine Atinkami. ⁸Kantankicha maika gatata noati, nokogaketari nogavisanakerora Pentekoshite aka Epesoku. ⁹Noneavetakatyo año tovaini kisaigakenarira kantankicha aikiro añoityo tovaini kematsaigankitsirira. Ario okañotaka aikiro año tovaini kogaigankitsirira nonkenkitsatimoigakerira.

¹⁰Irogonketakemparika Timoteo kara negintekyara pagaigavakeri kameti irishinetakempaniri ganiri itsarogi. Ariotari ikañotakenari naro yantavagetinirira Atinkami. ¹¹Irorotari nokantantaigakempirira negintekyara pagaigavakeri pinkemisantasanoigakerira. Antari impintsatanaemparika pinkavintsajaigavaeri pogavokiigaaterira piniaigavaerira kameti iripokaera aka ineapaenara, nogiavaeritari iripokaera irirori intiegiri aikiro apigematsaegine giaigakerineririra. ¹²Yogari apigematsaegine Aporoshi nokantanavetakari iriatatera kara ineagakitempira. Maika tekya inkoge iriatera, kantankicha impogini ariorika ineake kametitake iriatatera ario pinkante iriatake.

¹³Tsikyaniara yamatavainaitimpikari irapakuakagaitakempira ganigera pikematsaigai, ontityo pinkantakani pinkematsasanoigake. Gara pitsarogaventaigiro pikematsaigakera, onti pishintsitashiigakero. ¹⁴Tatarika pantaigake pisuretakova-

kagaigakempara kameti ganiri otimi onkenantakemparira pinkisavakagaigakempara onti pintavakagaigakempa.

¹⁵Napigematsaegine, viroegi pogoigaketari yogari Esetepanashi intiegiri iitaneege intiegi iketyosanorira kematsaigakeri Atinkami anta Akayaku, impo ovashi ipirinentavageiganakero ikavintsavaveiganakerira irapigematsaegine imutakovageiganakerira. ¹⁶Maika nokogake pinkemisan-tasanoigakerira, kantankicha gara paniro iiroegi. Ariotyo pinkañotagigakempari aikiro maganiro kañogari-rira iiroegi imutakotantavageigira, aikiro yantavageiginirira Atinkami.

¹⁷Matsi ariokonatyo ipokake aka Esetepanashi intiri Jorotonato intiri aikiro Akaiko, yogishineagakenatari kañomatata vintieginirikatyo pokaigankitsi. ¹⁸Yogishineagakenatyo kara nokemakoigakempitari. Ario okañotaka yogishineaianakempi viroegi aikiro, pogoigaketari inkamantaigakenara magatiro pisureigakarira. Kametitake pishineventaigakemparira iiroegi, pairotari yantavageigakeneri Atinkami.

¹⁹Yogari kematsaigatsirira patoigeigacharira Ashiaku ikogaigake pinkemakoigakerira año isureigakempi. Ario ikañotaka Akira irirori ontiri Pirishira intiegiri aikiro maganiro patoitaigacharira ivankoku ikogaigake pinkemakoigakerira año isureigakempi, itentagaigakempitari ikematsaigakerira Atinkami. ²⁰Ario ikañogaka aikiro maganiro apigematsaegine año isureigakempi. Kametiky pagavakagaigakempa pishinevakaigakempara.

²¹Maikari maika tsikyata naro Pavoro nontsirinkaganakempiro oka nonkantaigakempira añoona omirinka nosureta-koigakempi.

²²Tyanirika terira intasanotempari
Atinkami inkisashivagetakenkanityo
iMaranata!^o

²³Maika, napigematsaegine, nokogake
inkavintsaavageigakempira Atinkami

Jesokirishito. ²⁴Notasanovageigakempi-
tyo kara maganiro viroegi, notentagai-
gakempitari akematsaigakerira irirori.
Ario onkañotakempa. Amen. *Maika*
intagati, Pavoro

o 16.22 Maranata onti arameo onkantakera “Tainapage, Notinkami” onti rika “Pokapai Atinkami”.